

續
文
獻
通
考

續文獻通考卷之六十二

皇明進士雲間王圻纂輯

節義考 忠臣一

商

武王伐紂伯夷叔齊叩馬諫曰父死不葬爰及干戈可謂孝乎以臣弑君可謂仁乎左右欲兵之太公曰義人也扶而去之夷齊耻食周粟隱于首陽山作歌曰登彼西山兮采其薇矣以暴易暴兮不知其非矣神農虞夏忽焉沒兮我安適歸矣吁嗟徂兮命之衰矣遂餓而死

春秋

徒人費齊臣襄公誅屢弗得鞭之見血走出遇賊于門劫

而束之費請先入伏公而出闕死於門中

陳不占齊臣聞崔杼弑莊公將赴之餐則失匕上車則失
鞚御者曰怯如是有益乎不占曰死君義也無勇私也
吾不以私害公遂往聞戰鬪聲恐駭而死

申蒯齊莊公侍御崔杼弑莊公蒯謂其宰曰爾以孥免我
將死宰曰免是反子之義也與之皆死

邢蒯墮齊臣崔杼弑莊公蒯墮使而返將入死而報其君
其僕曰君無道人莫不聞大夫何死之墮曰食其祿者
死其事吾食亂君之祿矣又安得治君而死之遂驅入
死僕曰人有亂君猶死之我有治長可生乎遂結轡自
刎

杞梁齊大夫莊公伐莒爲車五乘之宿梁不與歸而不食其母曰汝生有義死有名則五乘之宿盡汝下趣食乃行出關獲甲首三百莊公止之不聽遂闔而死

華周齊大夫齊侯伐莒周先遇莒子于蒲侯氏莒子重賂之使無力戰周曰貪貨棄命何以事君遂與杞梁俱戰死

石他人齊人陳恒弑齊簡公而盟者皆完其家不盟者殺之石他人曰昔之事其君者皆得其君而事之今謂他人曰舍而君而事我他人不能雖然不盟則殺父母也從而盟是無君臣之禮也不如退而自殺以禮其君遂自殺

巴蔓子巴國人仕爲將軍周沒國亂蔓子請師于楚許以
三城楚已救巴遣使請城蔓子曰藉楚之靈克濟禍難
誠許楚王城可持吾頭往城不可得乃自刎使者以蔓
子之首報楚王楚王曰使吾得臣如蔓子用城何爲乃
以上卿之禮葬其首巴亦以上卿之禮葬其身于施州
朱厲附莒臣穆公不知其才斥之及穆公有難朱厲附力
戰而死曰吾以激天下不知其臣者

田單晉臣佛盼以中年叛田單曰義死不避鈇鉞之罪義
窮不受軒冕之服無義而生不仁而富不如烹遂死之
莊善楚臣聞白公爲亂辭其母而行三廢車下其僕曰子
懼矣何不返曰懼者吾私也死義吾公也及公門刎頸

而死

長兒子魚絕智伯囂而去之三年矣及聞智伯見殺曰吾聞仁者無餘愛忠臣無餘祿吾聞智伯之死而動吾心餘祿之加于我者至今尚存吾將徃依之遂返而死

解揚晉大夫奉使如宋使無降楚楚人執而厚賂之使反君命揚卒致君命楚欲殺之以其不屈旣而釋之

荀息晉大夫晉獻公將卒囑其子奚齊卓子曰以是藐諸孤辱在大夫荀息曰臣竭其股肱之力加之以忠貞其濟則君之靈也不濟則以死繼之後里克弑奚齊卓子荀息死之

狼譚晉大夫晉襄公斥而不用後與楚戰彭衙譚將死之

人曰子不見信于君奚爲死譚曰今若不死是君之斥
我宜矣遂以其屬馳秦師死焉晉師從之大敗秦
弘演衛大夫狄術殺懿公而殘其屍僅畱肝焉演遠
使返報哭於肝之側曰臣請爲表自剖其腹納肝于內
而死

戰國

王蠋臨淄畫邑人初燕以樂毅爲上將軍伐齊齊師大敗
湣王出走樂毅入臨淄聞王蠋賢令軍中環畫邑三十
里無入請蠋蠋謝不往燕人曰不來我且屠邑蠋曰忠
臣不事二君烈女不更二夫齊王不用吾諫故退而耕
于野國破君亡吾不能存而又欲劫之以兵吾與其不

義而生不若死遂經其頸而死毅乃封其墓

讓智伯臣也智伯爲趙襄子所滅讓欲報仇伏橋下襄子至橋馬驚索之得讓襄子曰此義士也吾謹避之耳釋之後乃漆身爲癩吞炭爲啞其妻不識其友識之乃曰以子之才臣事趙孟必得近幸子乃爲所欲爲顧不易耶何自苦如此讓曰旣委質爲臣而又求殺之是二心也吾所爲愧天下人臣懷二心者耳卒不聽後入襄子宮中塗廁欲刺襄子襄子執之請於襄子三斬其衣而死

肥義趙人趙武靈王廢太子章而立少子何爲王自爲王父使肥義輔之後章因武靈王遊沙丘詐以王父命召

王義知有變請先嘗之曰無故而後王可入也肥義乃先入章殺之

李同趙邯鄲人秦圍趙急同說平原君以家財享士得敢死士三千遂與赴秦軍秦軍却三千里後竟戰死封其父爲侯

漢

張良韓人韓爲秦所滅良自以五世相韓第死不葬期必報仇乃陰募力士伺始皇至沙丘以鉄椎擊之誤中副車始皇命天下大索十日後輔漢滅秦又報項羽乃從赤松子遊

周苛爲御史大夫楚圍滎陽急漢王遁去使苛守之楚破

滎陽苛嫚罵不屈項羽怒烹苛

紀信爲漢王將項羽圍漢王于滎陽甚急紀信願假王衣服夜從女子二千人出東門僞降漢王因出西門遁去羽執信烹之

蘇武杜陵人武帝天漢中武以中郎將持節使匈奴會長水虞常等謀殺漢降人衛律而劫單于毋闕氏歸漢單于使律治之常引武副張勝知其謀單于怒召武受辭武謂假吏常惠等曰屈節受命雖生何面目以歸漢引佩刀自刺律驚自抱持之武氣絕半日復息單于壯其節遣人候問武而收繫勝律謂武曰副有罪當相坐舉劔擬之武不動律曰律前負漢歸匈奴蒙恩富貴蘇君

今日降明日復然空以身膏草野誰復知之武罵律曰
汝爲人臣于不顧恩義畔主背親爲降虜于蠻夷何以
汝爲見且單于信汝使決人死生不平心持正反欲闕
兩主觀禍敗匈奴之禍從此始矣律白單于單于愈欲
降之乃幽武置大窖中絕不飲食天雨雪武嚙雪與旃
毛并咽之數日不死匈奴以爲神乃徙武北海無人
處使牧羝曰羝乳乃得歸別其官屬各置他所武留匈
奴凡十九年始以強壯出及還鬚髮盡白

龔勝楚人哀帝末徵爲京兆尹王莽秉政謝病歸莽復遣
使迎勝使者至以印綬就加勝身勝輒推不受兩子及
門人勸之行勝曰吾受漢家厚恩無以報今年老矣旦

暮入地豈宜以一身事二姓下見故王哉語畢遂不復開口飲食積十四日死

翟義青州牧王莽居攝時義舉兵西誅不當攝者兵敗死之餘衆歸王翁亦守節力戰死之

章明周新繁人官至大中大夫王莽篡位明周曰吾不以一身事二姓遂自殺

田強武陵五溪酋領王莽欲錫強銅印強以子十人雄勇過人乃曰吾等漢臣誓不臣莽以其三子將五萬人下屯浣東各築一城烽火相接田子居上城王子居中城倉子居下城

馬適求鉅鹿人以布衣謀誅莽不克死之

東漢

王嘉王皓蜀郡人王莽篡位並棄官西歸建武初公孫述稱帝遣使徵皓嘉恐不至遂先繫其妻子使者謂嘉曰速裝妻子可全對曰犬馬猶識王况于人乎皓先自殺以首付使者述怒遂誅皓家屬王嘉聞而嘆曰後之哉乃對使者伏劍而死

虞俊無錫人哀帝時爲御史稍遷丞相司直王莽秉政召爲司徒俊仰天嘆曰願爲漢鬼不能事兩姓飲藥而卒光武卽位表其墓

解文卿鄭文伯俱仕公孫述爲尚書時述擬蜀成都人羅衍說解鄭諫述使速歸漢爲子孫福解鄭從之述怒閉

二子于薄室二子守志不回遂幽死

李業字巨游蜀人平帝時除爲郎王莽以業爲博士病不
之官因匿山谷公孫述僭號素聞業名徵之欲以爲博
士業固辭疾不起述羞不能致乃使持毒酒奉詔命以
劫之業不屈遂飲毒而死蜀平光武詔表其門閭

溫序太原人建武中徵爲侍御史遷護羌校尉行部至襄
武爲隗囂別將所拘劫諭使從序曰分當效死義不貪
生遂以口啣鬚曰旣爲賊所殺毋令鬚汚血遂伏劍死
伏隆湛之子光武時爲大中大夫張步據齊地隆奉使不
屈死之

臧洪爲東郡太守袁紹圍其城歷年糧盡城陷洪被執不

屈死之郡丞陳容亦同日死

吉平建安時醫人與董承謀誅曹操事洩爲操所擒拷掠無完膚猶欲以舌吞賊竟死之

耿紀漢少府韋晃漢司直又有金禕者自以世爲漢臣與紀晃起兵欲挾天子以討曹操南援劉備竟不克而死徐璆字孟玉廣陵海西人中平初爲汝南太守轉東海相獻帝遷許以廷尉徵方詣京師爲袁術所逼授以上公之位璆嘆曰龔勝鮑宣獨何人哉守以必死術不敢逼審配爲袁紹冀州牧操兵入冀被執不屈死之

蜀漢

習珍襄陽人仕先主爲裨將孫權襲殺關羽珍與樊冑等

舉兵弗克潘濬招降珍曰吾爲漢鬼不爲吳臣糧盡自
滅贈邵陵太守

張任事劉璋璋遣任與劉瓚率精兵拒先主於涪爲先主
所破已復敗于滙橋先主聞任之忠勇令軍降之任厲
聲曰老臣終不復事二主矣乃殺之

王連劉璋時爲梓潼令昭烈起兵葭萌連守不降昭烈義
而釋之

嚴顏劉璋時爲巴州刺史張飛破巴州斥以胡不早降顏
曰我州但有斷頭將軍無降將軍飛大怒趣命斫頭顏
曰斫頭便斫頭何爲怒耶飛義而釋之後竟自刎死

諸葛瞻亮之子也仕蜀爲尚書僕射魏鄧艾寇蜀遣人誘

降瞻斬其使後及子尚皆死之

曹魏

劉整鄭像合肥守城士也諸葛恪圍合肥城中遣整像後先出城傳消息皆爲賊所得以不從賊而死嘉平中鎮軍將軍毋丘儉上言整像爲兵能守義執節弟子宜有褒異詔追封皆關內侯子襲爵

閻溫天水人仕魏以涼州別駕守上邽會馬超奔上邽郡人舉迎之溫不能禁乃還州超復圍之溫夜潛出欲告急夏侯淵賊執詣超超曰若謂城中無救則貸汝溫僞許及詣城下大呼曰大軍不過三日至勉之超怒殺之韋忠平陽人年十二喪父哀慟廬墓武帝時爲郡功曹太

守陳楚爲山羗所執忠願代死賊義而釋之後以鎮西
大將軍討叛者矢盡不屈死

晉

周處字子隱陽羨人惠帝永熙七年齊萬年屯梁山有衆
七萬梁王彤夏侯駿使處以五千兵擊之戰敗弦絕矢
盡救兵不至左右勸處退處按劒曰是吾効節致命之
日也遂力戰而死

稽紹康之子也惠帝時爲侍中河間成都王舉兵帝征之
奉準謂曰今往安危難測卿有佳馬乎紹正色曰死生
以之佳馬何爲乘輿敗績于蕩陰帝面中三矢百官侍
御皆散紹朝服登輦以身衛帝兵人引紹斫之帝曰忠

臣也勿殺對曰奉太弟令惟不犯陛下一人耳遂殺之
血濺帝衣後左右欲浣帝曰稽侍中血勿浣也

王斌仕晉爲安北將軍懷帝永嘉二年石勒陷長樂斌死
之

王連爲扶風太守劉曜攻陳倉連敗死之

吉朗仕晉爲御史中丞愍帝建興四年劉曜陷長安帝出
降朗嘆曰吾智不能謀勇不能死何忍君臣相隨北面
事賊虜乎乃自殺

卞壺句容人成帝咸和中爲尚書令成陽公督軍討蘇峻
戰敗死之二子瞻盱亦赴敵死其母撫屍哭曰父爲忠
臣子爲孝子夫何恨乎時丹陽尹羊曼黃門侍郎周導

廬江太守陶瞻俱戰死瞻侃子也壺後贈侍中謚忠貞
二子皆贈官

段匹碑大興中官幽州刺史爲石勒所敗乃着朝服持節
見石季龍曰我受國恩志在滅汝不幸至此不能爲汝
敵及見勒又不爲禮遂遇害

虞悝臨湘人譙王承爲湘中刺史徵爲長史王敦反援長
沙悝被執遂死之弟望亦爲譙王司馬討敦力戰死詔
贈悝襄陽太守望滎陽太守祭其墓以少牢

易雄瀏陽人少爲縣吏念無由自達乃脫幘掛縣而去後
舉孝廉爲州主簿張昌之亂執太守萬嗣將斬之雄與
賊爭論曲直賊乃舍去雄後爲春陵令會王敦反雄首

奮忠義起兵討之力屈城陷爲魏人所虜送到武昌抗辭不屈敦遣人殺之

樂道融丹陽人爲王敦叅軍敦以討劉隗爲名遣道融道融憤敦之逆因說甘卓襲敦卓大然之旣而卓與敦和將旋軍道融晝夜泣諫憂憤而死

周崎邵郡人爲湘州從事譙王承使求救于外爲王敦將魏乂所執乂臨以白刃曰汝爲語城中稱大將軍已破劉隗等外援隔絕我當活汝崎僞許之至城下大呼曰王敦軍敗於吳甘卓已克武昌卽日分遣大衆來赴此急努力堅守賊今散矣乂殺之

周該慈利人從父級宜郡內史王敦爲逆級遣該使湘州

約譙王丞甘卓同獎王室爲敦所執訊掠之至死不言
殺口是得免于難

周嶺字國寶會稽人好學知兵永徽間四面盜起積糾鄉
人禦之衆寡不敵賊誘之從爲亂積怒曰恨不斬汝萬
段肯從汝反耶遂手刃數十人自刎而死事聞立廟以
祀

俞縱宣城人成帝時爲桓彞部將蘇峻分兵陷臺城內史
桓彞死之縱守闔石韓晃攻之將敗左右勸退軍縱曰
吾受桓侯厚恩當以死報吾之不可負桓侯猶桓侯之
不負國也遂力戰而死彞後追贈廷尉謚曰簡縱贈義
興太守

陽瓚穆帝永和中爲司馬魏攻滑臺瓚堅守死之詔稱寧
遠司馬濮陽太守陽瓚滑臺之逼勵誠固守投命殉節
在危無撓古之烈士無以加之可贈給事中爲恤其家
賜絹一百疋粟三百斛

辛謐晉故散騎常侍隴西人也永和中趙石閔盡滅石勒
之族而自立爲帝以謐有高名乃備禮徵爲太常謐遺
閔書以爲物極則反數至則危君王功已成矣宜因茲
大捷歸身於朝必有由夷之薦享喬松之壽矣閔不聽
因不食而卒

丁穆爲順陽太守孝武帝寧康時苻堅遣衆入寇穆戰敗
被執至長安稱疾不仕僞朝遂遇害贈龍驤將軍雍州

刺史

吉挹爲魏興太守秦陷魏興挹死之符堅嘆曰周孟威不

屈于前

周彪字也秦復其母遂降常有不遜語秦待之彌厚

丁彥遠潔已於後

卽

楊

吉祖冲閉口而死

卽

何晉氏之多忠臣也

常簡爲東平太守孝武時慕容垂遣子寇廩丘簡與戰死之

袁崧汝陽人安帝時爲吳郡太守孫恩作亂攻陷滬瀆城崧死之

何無忌東海剡人盧循之亂握節而死謚曰忠肅

沈勁吳興人常以父克失身王敦爲耻後守洛陽城陷不屈爲慕容恪所害神色自若恪曰今定洛陽而殺沈勁

實有愧于四海

謝邈晉人爲吳興太守孫恩之亂爲賊所執逼令北面邈勵聲曰我不得罪天子何北面之有遂被害

王充爲博陵守將秦符丕天安中燕慕容麟攻秦博陵城中糧竭矢盡功曹張猗踰城出聚衆以禦麟充臨城數之曰卿是秦民吾是卿君卿起兵應賊而號義兵何名實之相違也古人求忠臣必于孝子之門卿母在城棄而不顧吾何有焉今人取卿一時之功則可矣寧能忘卿不忠不孝之罪乎麟拔博陵執充殺之

韓延之堵陽人爲西平府錄事叅軍劉裕代司馬述之密書招延之延之報書甚倨厲以裕父名超字顯宗于是

字已曰顯宗名子曰翹示不臣劉氏

宋

劉康祖彭城人累官司馬左軍將軍受命北伐率師出許洛還救壽陽力戰而死魏人傳其首面如生贈益州刺史謚曰壯

上天與吳興餘杭人元嘉末爲廣威將軍元兗劭入弑事變倉卒舊將皆望風屈附天與不暇被甲執刀持弓疾呼左右出戰射賊劭于東堂幾中逆徒擊之臂斷倒地乃見殺世祖贈龍驤將軍益州刺史謚曰壯侯以旌忠節

劉琨之爲竟陵王誕司空主簿誕作亂以琨之爲中兵叅

軍不就死之贈黃門郎

袁粲字景倩湛之從孫宋明帝時累官中書令臨崩粲受顧命順帝立徙粲鎮石頭及齊篡位粲不欲事二姓率宿衛兵攻之不克見害沈休文撰宋書擬立袁粲傳世祖曰袁粲自是宋家忠臣

齊

丘冠先字道元吳興人少有節義永明中位給事中使蠕蠕蠕蠕逼令拜冠先執節不從以刃臨之冠先曰能殺我者蠕蠕也不能以天子使拜戎狄者我也遂見殺武帝以冠先不辱命賜其子雄錢一萬布三千疋雄不受詣闕上書曰臣父執節如蘇武守死如谷吉遂不書之

良史甄之褒贈萬代之後誰死社稷先建元四年車伯
朗卿使不異抗節是同詔正員外郎此天朝舊準臣父
成例也今僧朗反葬家塋臣父湮棄絕域語忠烈則亦
不謝車論荼毒則彼優而此劇名位不殊禮數宜等乞
申褒贈不省

劉思忌爲新野太守時魏主引兵寇新野築長圍守之城
陷不屈遂遇害

顏見遠爲御史中丞因梁武受禪不食發憤痛哭而卒
梁

程文秀以功至新安太守後從吳明徹侵周戰敗不屈死
于獄

樂子雲清陽人以江陵令除光祿卿魏克江陵衆皆奔散
呼子雲子雲曰終爲虜矣不如守以死節遂仆地卒于
馬足之下

北魏

于什門代人胡元時使諭馮跋聲氣厲然遂被拘留衣裳
敗壞跋遣以新服堅拒不受歷二十四年後馮弘上表
稱臣乃送什門歸拜侍御史太武褒美比之蘇武

朱長生代人孝文時爲員外散騎常侍與同郡于提俱使
高車其王阿伏至羅以兵脅之降長生與提厲聲曰我
爲魏鬼不爲汝臣拘三歲始放還孝文以其守節拜長
生河內太守提隴西太守並賜男爵

王柔世館陶人仕魏爲方城縣子梁師攻圍自知力不可全乃先燒府庫後殺妻子旣而城陷不屈被害詔進爵爲伯贈齊州刺史

崔楷博陵鮮卑人孝文帝時爲殷州刺史賊來攻楷拒守力竭城陷執節不屈死之贈侍中子士元亦戰歿贈平州刺史

劉渴侯稟性剛烈魏太和中爲徐州牧以禦敵被擒不降而死贈平州刺史上庸侯

道登永安初爲梁將韋休等所虜面縛臨刃令其招降鄉曲道登厲聲唱呼但當努力賊無所能賊遂屠戮之又荊州被圍行臺宗君恩遣使宗女等四人入城曉諭爲

賊所獲執女等巡城令其改辭女等大呼大軍垂至堅
守莫降賊忿各剗其腹然後斬首二州表其節義道登
等並賜五赤郡五等子爵聽子弟承襲遣使詣所在吊
祭

北齊

鮮于世榮漁陽人爲太子太傅周武帝入代遣以瑪瑙酒
鍾世榮得卽碎之周兵入鄴被執不屈而死

隋

皮子信爲洮州刺史高祖開皇三年吐谷渾寇臨洮皮子
信死之

劉弘彭城人平陳以功加上儀同拜泉州刺史會高智慧

作亂弘堅守百餘日賊知其饑欲降之弘抗節彌厲比城陷爲賊所害上嘉歎久之官其子

張須陀滎陽通守李密逼滎陽須陀拒守後被伏兵邀擊衆皆潰散須陀仰天嘆曰兵敗如此何面目見天子下馬戰死

游元明根玄孫也煬帝時奉使黎陽楊玄感作逆脅以兵不屈死之贈銀青光祿大夫

杜松贊北海人大業末賊楊厚爲寇松贊出覲爲賊所獲令之招降不從死之詔贈朝散大夫

先君素隋恭帝侗皇泰元年

卽唐武德元年

守河東唐遣獨孤懷

恩攻之不下招之不從遣其妻至城下謂之曰隋室已

亡君何自苦君素曰天下名義非婦人所知引弓射之
應弦而倒君素志在守死每言及國家未嘗不歔歔及
江都間變左右殺君素以降

陰世師武威人壽之子也煬帝時拜張掖太守後遷左翊
衛將軍與代王留守京師唐軍至世師自以世荷隋恩
拒守不下見殺

穆肅江南人隋末守臨江政尚清明秩滿之京假道將樂
金溪聞唐受隋禪義不事二姓遂投水死邑人義之殮
其屍葬沙磧立祠祀之

唐

張德政高祖時爲鄆州都督突厥來寇鄆州德政死之

劉感岐州鳳泉人武德初以驃騎將軍鎮守涇州爲薛仁果所圍戰敗被執不屈而死

李育德趙州人武德初爲涉州刺史引兵拔賊河內堡三十一所王世充怒悉銳士攻之育德力戰與三弟皆歿李玄通武德四年爲定州總管時劉黑闥取定州黑闥執玄通愛其才欲以爲大將玄通不可囚之故更有以酒肉餽之者玄通飲醉給守者曰吾能劒舞願假吾刀玄通舞竟太息曰大丈夫受國厚恩鎮撫方面不能保全所守有何面目視息世間哉引刀自刺而死

鞠稜武德四年爲冀州總管時劉黑闥取冀州稜死之

王公政武德五年爲垣州刺史劉黑闥陷垣州公政死之

葉顥爲建州刺史武德初妖賊亂城陷不屈而死

夏侯端壽州壽春人唐初詔以大將軍招撫關東爲王世充阻而留之不屈死

常達陝州人武德初爲隴州刺史不屈于薛舉而死

呂子臧河東人武德中爲鄧州刺史不屈于賊朱粲而死

王行敏并州樂平人武德中以屯衛將軍死于竇建德

羅士信歷城人武德中以絳州總管死于劉黑闥

張道源鄆人武德中守趙州爲竇建德所執不屈而死

敬士弘絳人武德時爲隱太子死

周積金壇人永徽間四境盜起積糾合鄉人拒之衆寡不敵賊誘之爲亂積曰恨不斬汝萬段肯從汝爲賊耶遂

手刃數十人自刎死事聞封爵立廟至今祀之

龐孝恭博白人龍朔中以遼東道行軍總管征高麗爲蓋蘇文所敗不屈而死

李安靜高宗時爲右驍衛將軍武后受禪獨不肯勸進有司劾以謀反安靜曰以我唐家老臣欲殺卽殺若云謀反實無可言遂遇害

格元輔浚儀人舉明經累鳳閣鸞臺平章事武后欲以武承嗣爲太子元輔不從坐以謀反斬之

顏杲卿字昕臨沂人玄宗天寶十五載爲常山太守賊將史思明陷常山杲卿起兵纔八日守備未完史思明蔡希德引兵皆至城下杲卿晝夜拒戰糧盡矢竭城陷執

杲卿及袁履謙等送洛陽祿山數之曰汝是范陽戶曹
我奏汝爲判官不數年超至太守何負于汝而反耶杲
卿瞋目罵曰汝本營州牧羯奴天子擢汝爲三道節度
使恩幸無比何負於汝而反我世爲唐臣祿位皆唐有
雖爲汝所奏豈從汝反耶我爲國討賊恨不斬汝何爲
反也躁羯狗何不速殺我祿山大怒并袁履謙等縛於
天津橋柱而劓之二人比死罵不絕口顏氏死者三十
餘人杲卿後贈太子太保謚忠節

無諛玄宗天寶時爲滎陽太守安祿山反圍滎陽無諛
率衆棄城聞師譟自墜如雨無諛與官屬皆死之詔贈
尚書謚毅勇

龐堅涇陽人薛愿汾陰人天寶時安祿山反堅與愿共守
潁川城中士單糧少而愿堅晝夜戰自正月至十一月
諸郡兵無援者城遂陷二人不屈俱死之

畢炕天寶末爲廣平太守拒安祿山城陷死之詔贈戶部
尚書

雷海清天寶中樂工初祿山取長安樂工犀象詣洛陽宴
其群臣於凝碧池盛奏衆樂梨園子弟徃徃歔泣下
賊皆露刃睨之雷海清不勝悲憤擲樂器於地西向慟
哭祿山怒縛於試馬殿前支解之

張興東鹿人肅宗至德元年爲饒陽裨將時史思明陷河
北攻饒陽彌年不能下思明併力圍之外救俱絕城陷

擒興謂曰將軍真壯士能與我共富貴乎興曰興唐之忠臣固無降理今數刻之人耳願一言而死思明曰試言之曰主上待祿山恩如父子群臣莫及不知報德乃興兵指闕塗炭生人大丈夫不能剪除兇逆乃北面爲之臣乎且足下所以從賊求富貴耳譬如燕巢於幕何能久安何如乘間取賊轉禍爲福長享富貴不亦美乎思明怒鋸殺之至死罵不絕口

張巡南陽人許遠敬宗曾孫杭州人巡初爲真源令遠爲睢陽守遠自以才不及巡邀巡同守遠居城中而巡出禦賊至德二載賊將尹子奇圍睢陽城城中食盡始與士卒同食茶紙既盡遂食馬馬盡羅雀掘鼠雀既盡巡

出愛妾殺以食士遠亦殺其奴然後括城中婦人食之
既盡繼以男子老弱賊登城將士病不能戰巡西向再
拜曰臣力竭矣不能全城生既無以報陛下死當爲厲
鬼以殺賊城遂陷巡遠俱被執子奇問曰聞君每戰皆
裂齒碎何也巡曰吾志吞逆賊但力不能耳子奇挾之
以刃乃與南霽雲雷萬春等三十六人皆被殺巡且死
顏色不亂生致許遠於洛陽後亦死之

陶閻洛陽人爲城父令與張巡同守睢陽城陷被執與石
永平李辭陸光煌朱珪宋若虛楊振威耿慶禮馬日升
張惟清廉垣張重孫景趨趙連城王森喬紹俊張恭默
祝忠平嘉隱翟良輔孫庭皎馬良等三十六人皆死于

難肅宗時贈開潞州大都督

元正仕監門尉兵曹參軍肅宗時史思明陷河洛賊以名購正仕度事急謂弟曰彼利吾名難免矣然不污身而死吾猶生也遂兄弟皆遇害事平贈秘書

盧奕滑州人懷慎少子安祿山陷東都奕朝服端坐被擒不屈數祿山罪臨刑西向再拜罵不絕口而死肅宗詔贈禮部尚書謚曰貞烈

李愬汶水人天寶中以東京留守死于安祿山之難穆宗詔褒其處難居首正色就死兩河聞風再固危壁

張介然猗氏人以守陳留死于安祿山

賈循華原人守幽州死于安祿山

程千里萬年人以禮部尚書死于安祿山

已上四人肅宗時詔追贈官其子孫

段秀實德宗建中四年爲司農卿朱泚召秀實議稱帝事
秀實勃然起奪源休象笏前唾泚面大罵曰狂賊吾恨
不斬汝萬段豈從汝反耶因以笏擊泚衆爭前殺之明
年興元元年詔贈太尉謚曰忠烈帝還都詔旌其門
張徹幽州節度判官至任遇府軍怨其從事盡殺之而囚
其帥且相戒獲徹置之帥所徹出門罵衆曰汝何敢反
罵不絕口而死事聞贈給事中

顏真卿杲卿從弟興元元年李希烈陷汝州詔真卿宣慰
之旣至與朱滔等四使同宴四使曰都統將稱大號而

太師適至是天以宰相賜都統也真卿叱之曰汝知有
罵安祿山而死者顏杲卿乎是吾兄也吾年八十知守
節而死耳希烈掘坎於庭云欲坑之真卿怡然見希烈
曰死生已定何必多端亟以一劍相與豈不快公心事
耶希烈乃謝之繼希烈僭號遣其將辛景臻謂真卿曰
不能屈節當自焚積薪灌油於庭真卿趨赴火景臻遽
止之至是聞希清伏誅忿怒遣中使縊殺之明年元貞
元年贈司徒謚文忠

高重捷德宗時名將也與朱泚將李日月戰敗斫首而去
朝廷憫其忠命束蒲爲首葬之朱泚見其首亦曰忠臣
也束蒲爲身而葬之

吳淑章敬皇后弟建中時以大將軍自願持節諭朱泚泚執之不屈被害

劉廼字永夷伊闕人建中時爲兵部侍郎以朱泚亂車駕幸梁州發憤不食而卒

蔡廷玉昌平人朱泚辟置幕府泚反不屈投河而死

符令奇臨沂人德宗時田承嗣任爲右職後田悅逆命令奇勸以忠順不從其子璘率三子同降唐將馬燧悅怒遂被害

孟華德宗時以檢校兵部郎中兼侍御史往諭王武俊使不與朱滔協謀武俊不從稱王授華禮部尚書華不肯起嘔血死

張仵爲澤潞將守臨淮爲田悅所執不屈而死

周曾李希烈部將也希烈反密謀取希烈不克而死時王
玢姚憺韋清亦希烈部將與曾同謀獨清得不死德宗
贈安定郡王實封二百戶又有呂貴康秀琳梁興朝賈
樂卿侯仙卿皆死希烈之難

張名振事李懷光爲部將欲懷光急攻朱泚以收京城爲
懷光所拉殺

石演芬本胡人爲李懷光養子懷光與朱泚連和演芬遣
人至行在言懷光無破賊意請罷其總統懷光知之罵
曰我待汝爲子汝何故反演芬曰太尉旣負天子演芬
安得不負太尉懷光使宰嚭之皆曰義士也斷其喉而

去

鄉人傑無爲人唐末盜起人傑以土豪招集強壯保障一方賊大入人傑挺身血戰度不能支仰天大呼自刎而死屍僵立者累日賊驚異舍其境遁去鄉人收葬立廟祀之

董全禎德興人天祐中爲御史兼八峇將首一日賊自浙東來全禎兵寡不能敵乃自斷其首已而雷電晦冥如有兵戈甚盛賊大驚潰邑人祀之

顧彥暉爲東川節度使王建來攻城陷不屈自刎舉族皆死

溫庭皓爲徐州觀察使龐勛反以刃脅之爲表求節鉞不

從遂遇害

黃碣閩人威勝軍節度使董昌辟以自副及昌反碣大罵不從爲所殺抵首溷中夷其家百口

王進岌爲冀州刺史憲宗元和十五年王庭奏陷冀州進岌死之

高沐渤海人貞元中爲李師道判官師道謀逆沐力解諭之不從遂爲所害

林蘊莆田人爲西川節度使劉闢推官闢反蘊諭以禍福闢怒欲殺之命行刑者以刀磨其頸脅之蘊罵曰死卽死我頸豈汝礪石耶闢知不可屈釋之

崔彥留懿宗咸通初爲徐州觀察使會龐勛反死義贈刑

部尚書焦璐李稅崔蘊柳泰盧宗嗣韋廷範皆爲勛所害後贈官有差錄用其子

林慎思字虔中長樂人咸通中登第由校書郎至水部郎中萬年縣令黃巢入長安迫以僞祿慎思罵賊而死何武壽州人嘗被誣枉至州投石自明守釋之未幾寇起卽請于守曰此真畢命之秋也命領偏裨入樅陽伏盜發兵潰武獨闕死

丘弘禮爲曹州刺史僖宗時朱全忠陷曹州弘禮死之孫揆字聖圭爲昭義軍招討使昭宗時討李克用被執不屈鋸解之鋸齒不行罵賊曰羯狗奴解人當束以板汝輩安知行刑者如其言鋸齒乃行至死罵不絕口

張蟾爲隸州刺史昭宗朝平盧節度使王師範陷隸州蟾死之

劉康義益都人昭宗時爲密州刺史楊行密陷城康義死之

王師範青州人爲淄青平盧節度使朱溫圍鳳翔師範捧詔書而泣起兵討溫兵及淮南力不能支爲溫所族敬播昭宗朝爲隸州刺史朱全忠陷隸州播不屈死之黃岳寧德人唐末由鄉貢入太學朱溫篡位王審知竊王號欲起岳岳度不能拒遂投于淵而死

周朴字太朴福州人黃巢得朴將用之朴曰我爲處士尚不仕天子安能從賊巢怒遂斬之湧白膏起數尺後人

立廟祀焉

張承業字繼元內常侍張泰養子初以特進監河東軍牛溫纂唐承業佐晉王存勗有復讐之志已晉王欲稱帝承業亟詣魏州諫曰吾王世世忠於唐室老奴三十餘年爲王收拾財賦召補兵馬誓滅逆賊復本朝宗社耳今河北甫定朱氏尚存而王遽卽大位殊非從來征伐之意天下其誰不解體乎王何不先滅朱氏復列聖之深讐然後求唐後而立之南取吳西取蜀汎掃宇內合爲一家當是之時雖使高祖太宗復生誰敢居王上者讓之愈久則得之愈堅矣老奴之志無他但以受先主大恩欲爲王立萬年之基耳王曰此非余所願柰群下

意何承業知不可止慟哭曰諸侯血戰本爲唐家今王
自取之誤老奴矣卽歸晉陽邑邑成疾不復起

續文獻通考卷之六十二終

續文獻通考卷之六十三

皇明進士雲間王圻纂輯

節義考 忠臣二

後梁

王彥章字子明鄆州壽昌人末帝時爲鄆州防禦使與唐將夏魯奇戰馬蹶被執莊宗愛其驍勇欲全活之彥章曰朝事梁暮事晉何面目見天下人乎終不從遂見殺張源德梁末守貝州時郡邑皆歸晉獨貝州堅守或勸出降不從遂被害

後唐

姚洪以指揮使戍閬州梁將董璋破閬州執洪不屈燃鑊

于前令壯士刳其肉而食洪至死罵不絕口明宗聞之
泣下錄其二子

夏魯奇字邦傑唐莊宗賜姓名曰李紹奇常解莊宗重圍
又擒王彥章官河陽節度使徙忠武後董璋攻遂州魯
奇閉城拒之旬月救兵不至城中食盡自刎死

張敬遠爲唐將契丹兵圍之楊光遠勸敬遠降敬遠不忍
背唐謂曰何不殺我降光遠卽斬敬遠降契丹後耶律
德光哀其忠遣人收葬

裴約唐澤州刺史時李繼韜以潞州留後叛降唐來攻澤
州約泣以諭衆曰吾死不從也嬰城自守城陷死之唐
主憫其忠爲立祠

後晉 沈斌祁州刺史時趙延壽引契丹兵攻祁州斌在城上延壽語之曰使君何不早降斌曰侍中父子失計陷身虜庭忍帥犬羊以殘父母之邦不自媿耻更有驕色何哉明日城陷斌自殺

後周 韓通爲周侍衛親軍副都指揮使恭帝元年遣朱祖帥師禦漢至陳橋爲諸軍推戴通謀率衆禦之軍校王彥昇逐焉通馳入其第未及闔門爲彥昇所害妻子俱死後宋祖贈通中書令以禮收葬

後蜀 高彥儔爲江寧制置使太祖乾德二年曹彬帥師至夔蜀彥儔拒之力戰不勝奔歸府第整衣冠望西北再拜縱火自焚死光義得其骨於灰燼中以禮葬之

南唐

劉仁贍爲壽州節度使堅守不下世宗遣使招降其子崇諫應其招仁贍立命斬之監軍周廷構以城降周仁贍遣害周以壽州爲忠正軍以旌仁贍之節

李延鄒爲泗州叅軍時周主自將伐唐攻濠泗州唐郭廷謂知唐不能救命延鄒草降表延鄒責以忠義廷謂以兵臨之延鄒擲筆曰大丈夫終不負國爲叛臣作降表廷謂斬之

張彥能南唐楚州守將也周世宗攻之與其副鄭昭業戰死所部千餘人皆無降者

孫晟密州人仕南唐爲右僕射及使周謂其副王崇質曰

吾終不負永陵一杯土世宗召問江南事不對乃收下
獄臨刑怡然南望拜曰臣惟以死報國唐主贈魯國公
鍾清爲江南主勤政學士時曹彬克金陵清朝服坐于家
兵及門舉族死之

胡則爲唐指揮使時曹翰攻江州不下刺史謝彥實集衆
謀納款則謂其下曰吾屬世受李氏恩安忍負之刺史
不忠欲背國爾曹能從我乎衆皆聽命乃與同列宋德
明等攻彥實執而殺之集衆爲唐固守城陷翰執之數
其拒命之罪對曰犬吠非其主公何怪也翰殺之

陳喬爲唐門下侍郎開寶八年曹彬克金陵喬與張洎約
同死社稷然洎實無死志至是喬徑入白唐主曰今日

續文獻通考

卷之六十三

三

國亡願加顯戮以謝國人唐主曰此乃曆數卿死無益也喬曰縱不殺臣臣何面目對士人乎遂自經死

宋

秦傳序江寧人淳化五年以夔陝巡檢使禦李順亂城陷父子皆死太宗錄其次子煦爲殿直煦死復以煦弟昉爲三班奉職

康保裔爲瀛州都部署真宗咸平二年契丹侵瀛州圍之救重左右請保裔易甲以遁保裔曰臨難無苟免正吾效死之日也遂決戰數十合兵盡矢絕而援不至保裔與宋順俱死之

劉紹榮爲益州都巡檢使時咸平三年益州戍卒作亂紹

榮死之

裴濟爲靈州知州咸平五年趙保吉集蕃部來攻靈州濟被圍餉絕刺指血染奏求救兵不至城遂陷濟死焉

景林洙通州人咸平間王均叛州有賊應之者林洙將鄉兵拒戰爲賊所戕首隕而身不仆跨馬奔歸州城東北隅人訝而呼之曰公無首矣于是始墜邦人卽其地立祠

劉平爲鄜延路副總管仁宗景祐時元昊寇延州平帥師往援與賊大戰衆潰平被執死之贈朔方節度使兼侍中

高敏登州人慶曆中爲涇源指揮使與西夏力戰而死贈

嘉州刺史錄其子

任福開封人慶曆中元昊寇渭州不屈死節贈武勝軍節度使賜第一區給其家錢及粟麥追封母妻錄其子

耿昭化丁南人仕爲蜀州司戶叅軍盜據城欲脅以官昭化大罵至斷手足不屈而死

耿傳昭化子以父蔭累官通判儀州徙慶州元昊入寇叅任福行營軍事諸將失利或勸傳避之傳愈前指顧自若被數創乃死詔贈右諫議大夫官其四子

王珪涇源都監也元昊入寇珪從任福戰好水川福陷圍中珪誓以死報國復入援福殺數十百人鞭撻掌裂奮擊自若矢中目乃還夜卒

張憲爲武畧大夫慶曆時貝州宣毅卒王則據城以叛憲與其子琳同死之贈武功大夫官其兩子

馬遂開封人爲北京指揮使王則叛賈昌朝使持榜入貝州招降旣見則諭以禍福不荅遂奮起抵則拒其喉毆之流血賊黨攢刃聚譟乃縛而支解之事聞仁宗嘆息久之贈官苑使官其五子

董元亨深州人仁宗時以貝州通判罵王則爲所害贈太常少卿錄其子三人

李英高要人爲欽州推官死儂寇之難一家十有三人贈比部郎中廟食高要

朱士堯馬平人與儂寇力戰于邕州敗北賊斷其首屍不

卷之九
五
什猶奔馬而還贈屯衛大將軍

曹覲字仲賓建安人爲建州司戶叅軍皇祐中知封州儂智高叛攻封州率徒決戰不勝被執賊戒勿殺梓使拜且誘以美官覲不肯拜且詈賊猶惜不殺徙置舟中覲兩日不食賊知其無降意害之至死詬賊不絕事聞贈太常少卿錄其四子後立廟封州

張拱廣西都監也儂賊圍邕州拱自州來援旣入而城陷不屈而死踰月得其屍如生

王正倫以太尉將兵擊儂賊戰死于難子景仁卽其地結草堂祠之朝廷嘉其節贈節度使謚曰忠顯

張日新安仁人皇祐間爲廣西邕州都監儂智高陷邕日

新力戰不支被執不屈死之

孔宗旦魯人皇祐中以邕州司戶叅軍叱罵儂智高爲所害贈太子中允

趙師旦積之從子皇祐中以太子右贊善大夫移知康州奮罵儂賊被害贈光祿少卿賜其母長安縣太君冠帔官其子弟并從子三人

王從政爲閤門祗候與儂賊戰于太平場被執以沸湯沃之終不屈而死贈信州刺史錄其孫三人

梁仲寶賓州人儂賊犯境率衆力戰死之郡人爲立廟

徐靈博白人爲宜州長史追儂賊至金城驛力戰死之贈

大理丞

郭恩開封人累官秦隴路兵馬鈐轄嘉祐中夏人入寇臥牛峯恩與力戰自旦至食時失利被執不屈自殺贈同州觀察使錄其子弟有差

張吉爲淮安鎮守烽卒神宗熙寧三年夏人寇慶州吉爲夏人所掠驅至城下呼令降吉反其辭賊怒害之至死罵不絕口事聞贈內殿崇班勇烈將軍錄其子

景思忠字進之普州安岳人神宗時以遂州駐泊都監與夷人力戰而死官其子及同死者之子七人

王奇汾州人神宗時以廣西都監死于蠻寇贈皇城使忠州防禦使官其後六人

蘇緘晉江人爲邕州知州熙寧九年交趾人圍邕緘悉力

拒守外援不至城遂陷緘殺其家三十六人因自焚死
城中人感緘之義無一人從賊者帝聞之嗟悼贈奉國
軍節度使謚忠勇邕人爲立祠元祐間賜額懷忠子明
正孫廣淵直溫與緘同死皆蒙褒贈

高永能元豐初破夏人有功進榮州團練使元豐五年夏
人寇永樂城陷其孫昌裔欲挾之從間道走永能嘆曰
吾結髮與西羌戰未嘗挫今年已七十受國恩恨無以
報此吾死所也遂戰而死詔贈房州觀察使錄其子世
亮爲忠州刺史

張建侯政和中爲辰州守與盧陽令王憲之救鎮江寨爲
賊黃安俊所執迫使諭寨中人出降建侯給諾至寨下

大呼曰爲人當識順逆我萬無求全汝等堅守勿二賊怒并憲之俱害之郡人立祠以祀

徐禧分寧人元豐中城永樂禧以給事中被詔與內侍李舜舉往相其事會賊趨新城禧亟往禦或曰被詔相城禦寇非職也禧不聽與舜舉俱至永樂城陷死之贈吏部尚書謚忠愍

高永年河東番官也崇寧初知岷州爲降羌所執死之彭汝方知衢州徽宗宣和初方臘陷城汝方罵賊以死贈龍圖閣直學士謚忠毅官其家七人

鞠嗣復宣和初知休寧縣爲方臘所得不屈賊不忍加害卒生還

宋旅字庭實莆田人知剡縣不屈於方臘而死贈朝散郎
錄其四子

詹良臣字元公睦州分水人以縉雲尉不屈于方臘被害
贈通直郎官其子孫二人

丁仲修字敏之温州人方臘陷樂清將渡江巡檢陳奎往
捕死之賊至仙遊夏祥遣輔襄迎戰數十合襄死之仲
修乃率鄉兵禦諸樂灣力屈而死

項德武義人郡之禁卒也與方臘戰于黃姑嶺下死邑人
哭聲振山谷圖其像歲時祝之

蔣煜仙居人有文學方臘欲妻以女煜辭之脅以拜亦不
從寇曰吾戮汝矣煜伸頸就刃置聲不絕而死

胡璽爲婺州教授遇方臘作亂以武奮遇害舉家死之詔贈奉議郎推恩二子

王行之大平人初除婺州士曹方臘黨寇婺州守臣皆遁去行之曰吾獄官也守吾職死分耳遂遇害事聞贈通直郎官其一子

毛臬字淑縝江山人以特恩爲歙士曹睦寇攻城官吏皆遜臬曰吾職司寇獄有繫囚義不可去乃攝州事時二子貢辟雍卽遣人持獄印縋城以出令獻于朝城陷臬坐府上賊脅使降不屈罵賊不絕口死之妻錢氏掖其姑弗忍去俱遇害事聞贈朝請郎官其後三人

劉士英宣和中通判太原府與將士王稟俱死于金寇

程迪宣和中從楊惟中征方臘有功累遷榮州團練使時金人入寇詔以迪提舉永興路軍馬及永興破迪率其徒力戰身被創幾徧絕而復蘇猶厲聲叱戰不已遂死之詔贈明州觀察使謚忠愍

張克戡字德祥侍中耆曾孫也宣和間知汾州與虜力戰而死一門同死者八人贈延康殿學士銀百兩絹五百匹紹興中謚忠確

傅察字公晦孟州濟源人宣和七年以太常少卿奉使金虜迴至境上幹離不脅之降不屈死之

江仲明台州人宣和間寇亂載老母逃山澗中猝遇寇逼使降仲明奮起罵賊死之

朱昭字彥明府谷人宣和中爲震武城兵馬監押攝知城事金人逼城盡殺其家人死守後中矢而死

張甲德興人爲邕州巡檢宣和時金兵犯順甲力戰死德祐元年詔贈忠利侯

史抗濟源人宣和末爲代州沿邊安撫副使金人圍代急抗夜呼二子稽古稽善曰吾輩語用事者鴈門宜擇帥增戍彼皆不吾省今城必陷吾將死事汝輩亦勿以妻子爲念而負國也二子泣曰惟命明日城破父子三人突圍力戰死于城隅

李翼麟州人宣和末爲代州西路都巡檢使金人取代遣使諭降翼射却之後兵敗被執粘罕欲臣之怒罵不屈

而死同時不屈而死者縣令李聳丞王唐臣尉劉子英
監酒闕城將官折可與

陸有常知臨淄縣臨朐土兵作亂有常率兵拒守死于陣
知益都張侃千乘縣丞丁興宗亦死之

孫益以福州觀察使知朔寧府被命救太原時張孝純已
將太原降金不肯啟門遂死之初益奏郡人孫谷爲掾
屬至是嘆曰吾身已許國又不忍負孫公亦死之

張確守隆德府時粘沒喝入威勝軍或勸確潰圍出確斥
曰吾守土臣頭可斷膝不可屈力戰而死

种師中洛陽人累官奉寧軍承宣使會金人內侵師中戰
死贈少師謚莊愍

李彥仙字少嚴鞏昌人爲陝州知州靖康元年金婁室攻陝奇彥仙才百端誘陷彥仙悉斬其使力盡城陷投河死贈彰武軍節度使建廟商州號忠烈官其子給宅一區田五頃諱忠厥時裨將龍門邵雲夏縣呂員登陝縣朱炎與賈何闔平趙成皆死並贈官

杜翊世鞏陽人通判懷德軍靖康初金兵奄至城陷翊世先火其家與妻張同縊死贈朝議大夫官其後十人名所居曰忠義坊

高子儒狄道人知蘭州龕谷寨金人陷熙河子儒聞副總管劉惟輔戰死力窮莫支乃先自刎其家與軍將韓清皆罵賊而死

黃璘字邦美浦城人登政和八年第後丞拱州靖康元年
金人襲拱州城陷虜迫郡縣吏役爲鄉導璘移病不出
虜驅迫之遂赴井死事聞贈朝奉郎官其弟之子爲璘
後

蔣興祖常州宜興人徽宗時知楊武縣靖康初金兵犯京
師道過楊武或勸使避興祖曰吾世受國恩當死于是
與妻子留不去及師至力不敵死焉年四十四詔贈朝
散大夫

楊震字子發代州崞人靖康中知麟州守建寧砦與子居
中執中俱死建炎二年贈武經郎長子存中貴請子朝
謚恭毅

曾悟字蒙伯肇之孫靖康中爲亳州士曹金人破城抗辭
慢罵衆刃劓之屍體無存者妻孥同日被害

李震汴人靖康初金人迫京師震時爲小校率所部三百
人出戰殺人馬七百餘已而被執問南朝皇帝所在震
曰我官家非爾所當問脅割垂盡猶罵不絕口

司馬朴光兄旦之孫靖康初以兵部侍郎使金握節而死
贈兵部尚書謚忠潔

郭忠孝字立之洛陽人少以父逵任補官舉進士累遷河
東路提舉坐事靖康初爲永興軍路提點刑獄及金人
寇永興兵寡或勸忠孝以監司出巡可以避禍忠孝不
答與經畧唐重分城而守金人陣城下忠孝募人以神

臂弓射之敵不得前已而城陷忠孝死之贈大中大夫
歐陽詢字全羨廬陵人靖康中以將作監臣出使極言祖
宗之地不可割時宰怒欲殺詢廼遣詢奉使割深州詢
至深州城下慟哭謂城上人曰朝廷爲奸臣所誤吾已
辦一死來矣汝等宜勉爲忠義報國金人怒執送燕焚
死之詔錄其忠無子官其壻曾敏恭

姜綬麗水人以忠勇士召募刲股藏書縋下南壁將往南
京求援爲金邏騎所獲厲聲叱罵被害官其子特立承

信郎

徐徽言西安人靖康中知晉寧軍兼嵐石路沿邊安撫使
晉寧不守金挾徽言去不屈死之統副孫昂及士卒皆

不屈被害事聞贈晉州觀察使謚忠壯再贈昭化軍節度徽言子岡從孫適俱死事世著忠義

孫昂靖康初爲太原路兵馬都監與徽言協志禦虜後引刀欲自刎爲金人所奪擁至軍前不屈而死贈成忠郎團練使昂父翊宣和中知朔寧州據太原死于陣亦世濟忠義云

李琪永福人官至武功大夫金虜犯闕召天下兵琪謂蔣炳文曰主憂臣辱主辱臣死豈可以道遠便自營私乎募死士三千人倍道兼行與賊戰死之贈忠州防禦使宋炎陝縣人蹶張命中補秉義郎金人圍城射死數百人比再圍以勁弩發毒矢殺千餘人城陷虜求善射者官

之災不應大戰死

李若水字清卿曲周人靖康中爲吏部侍郎帝如青城至金營金人逼帝易服若水抱持而哭詆金人爲狗輩金人曳若水出擊之且令曰必使李侍郎無恙若水絕不食或勉之曰事無可爲者今日順從明日富貴矣若水嘆曰天無二日若水寧有二主哉其僕亦慰解之曰公父母春秋高若少屈冀得一歸覲若水叱之曰吾不顧家矣後旬日粘沒喝召計事若水因歷數而罵之監軍撻斃其古噀血罵愈切至以刃裂頸斷舌而死金人亦相與言曰遼國之亡死義者十數南朝惟李侍郎一人呂由誠字子明誨之季子以父恩補官靖康初徙知集慶

府時羣盜蜂起崎嶇至郡金兵來攻由誠與判官趙令佳同心誓守城陷俱被執不屈死之

龔端新昌人欽宗稱其凜凜有直臣節後奉使河東路聞二帝北狩憤惋而卒

程振樂平人靖康中拜刑部侍郎金人寇汴梁索金帛無厭振與梅執禮等四人詣金營言比屋盡空無以塞命虜酋怒遂遇害贈端明殿學士謚剛愍

孫鉉自眉徙居戎州爲博士二帝北狩金人以鉉有名上庠指名檄取之義不屈以死

王履以修武郎副李若水使金抗虜不屈與若水俱死臨死畧無懼色且歌詩末章云矯首問天今天卒無言忠

臣效死今死亦何愆人聞而悲之

劉幹字仲偃崇安人第進士靖康中以資政殿學士充河北宣撫副使太原陷召入覲爲京城四壁守禦使京城失守遣使金營金人欲用之歸書片紙使親信持報諸子卽沐浴更衣酌卮酒而縊建炎初贈資正殿大學士累贈太師諡曰忠顯

吳革字義夫華陽人靖康初爲閤門宣贊舍人女直立張邦昌爲楚帝革率衆討邦昌不克死之

吳懋晉陵人靖康末仕爲禮部員外郎金人立張邦昌王時雍用事坐政事堂懋發憤罵之曰反虜吾不能擊汝如段秀實耶時雍回頭俱赤後吳并莫儔以表狀詣虜

營懋竟不屈

郭許德順中安堡人靖康中爲涇原副將不降金虜而死
贈武翼大夫忠州刺史同死者西安朱友恭亦涇原副
將贈敦武郎

王士言武舉進士靖康中畢力禦金虜死于澤州贈拱衛
大夫忠州團練使官其後五人

祝公明處州麗水人爲太原府蓋縣主簿靖康中與金人
力戰而死贈承事郎子陶爲唐州司戶亦死官所

陳邁知中山府爲金師所圍半年外無援師京都旣陷割
兩河求和邁弟光祿卿適至中山臨城諭旨邁遥語曰
主辱臣死吾兄弟平居以名義自處寧肯賣國家作囚

奴乎適泣曰兄但盡力勿以弟爲念後爲步將沙振所
害及其子錫并僕妾十七人建炎初贈特進

李熙靖晉陵人提舉醴泉觀邦昌使直學士院固拒不食
而卒贈延康殿學士

謝貺汝州人欽宗卽位上封事十篇論事切至金人犯汝
州貺自襄陽領兵往援力戰而死

李洧南豐人靖康之難率兵勤王至蔡州與金人戰死之
高宗官其二子

霍安國靖康中知懷州城陷一門無噍類高宗建炎元年
詔諸路詢死節之臣以聞贈延康殿學士

張叔夜永豐人從淵聖北行至白溝河仰天大呼扼吭而

卒建炎紹興間塋衣冠于寶積院之西朝廷褒其節詔有司卽墓立廟賜額旌忠謚忠文

李邈字彥清江人靖康中以青州觀察使知真定城陷金人欲其被髮左衽邈自去髮爲浮屠遂遇害高宗贈昭化軍節度使謚忠壯

劉翊靖康中爲真定府路都鈐轄金兵逼之解絛自縊死徐揆衢州人靖康中以太學生上書金酋請還二帝爲所殺建炎中贈宣教郎官其後

郭永大名元城人爲北京提刑建炎二年女直陷北京永死之家屬皆遇害

劉汲丹陵人爲鄧州安撫使時女直陷鄧州汲死之通判

鄭州趙伯振知潁昌府孫默知汝陽府郭贊皆不屈死
劉倚友字夢澤處州人靖康初以進士宰開封金人犯闕
受檄爲東壁彈壓官登城按視爲寇所獲脅使降倚友
罵不絕口死之

孫昭遠字顯叔眉山人建炎中爲河南尹金兵來攻衆欲
擁昭遠南還昭遠罵曰若等衣食縣官不以此時報國
耶叛兵怒反擊昭遠遂遇害官屬無免者贈徽猷閣待
制

唐重字聖任眉州彭山人建炎中爲永興軍經畧使知京
兆府城陷不屈而死贈資政殿學士謚恭愍時副總管
相宗閔提舉軍馬程迺等俱死之

曾孝序字逢原晉江人建炎初知青州金兵至爲叛卒所害城遂陷贈孝序光祿大夫謚威愍子許承議郎餘贈官有差

陳求道字得之咸寧人建炎中爲襄鄧隨郢鎮撫未幾招撫劉忠叛欲奉求道爲主求道正色斥罵賊拔出舌斷之妻及二子俱被害

王琦弓門砦巡檢建炎中禦金人于熙河金人立招降旗衆皆招拜琦獨不拜金人殺之

楊粹中真定人建炎二年知濮州時金人入寇粹中固守月餘城陷粹中登浮圖不下粘罕嘉其忠義許以不死粹中竟不屈而死事聞贈徽猷閣待制

向子韶字和卿敏中之從孫舉進士累官京東轉運使高
宗朝知淮寧府金人犯城子韶親擐甲冑率諸弟誓以
死守及城陷爲賊所執執手責罵金人殺之闔家遇害
贈通議大夫謚忠毅

周中濰州人建炎二年金人攻城中率家衆乘城拒守城
陷闔門死之紹興六年贈官

杜昉爲密州通判建炎初寓居武陵賊鍾相亂欲強使從
已昉罵不絕口遂遇害

上官悟字仲達用蔭累官秘閣修撰充京畿轉運使建炎
三年爲京東副留守時劉豫叛降金因遣人說降悟斬
其使復賂悟左右使說悟復斬之金兵攻東京愈急力

不能支城陷死之贈右文殿修撰官其後五人

王復知徐州建炎三年女直陷徐州復死之闔門百口皆被殺贈資政院學士謚壯節

章雲就麗水人建炎中賊將逼處州雲就以守將募往諭降賊許諾既而官兵掩至賊以爲賣已遂遇害後人立祠祀之

張縝金壇人建炎中守楊州金兵圍城城陷縝及妻子皆死之

楊邦乂吉水人政和進士知溧陽縣僕射杜充降金濟江鼓行迫城李稅陳邦光率官屬迎拜邦乂以血書衣裾曰寧作趙氏鬼不爲他邦臣金將宗弼遣人說之明日

遙望宗弼大罵宗弼怒剖其心事聞贈直秘閣賜田三頃官爲殮葬卽其地賜廟褒忠謚忠襄官其四子

崔縱字元矩臨川人高宗將遣使通問二帝縱毅然請行乃授朝請大夫右文殿修撰試工部尚書以行比至首以大義責金人請還二帝又三遺之書金人怒徙之窮荒縱不爲少屈久之金人許南使自陳而聽其還縱以王事未畢不忍言又以官爵誘之縱以恚恨成疾竟握節以死洪皓還始歸縱之骨詔以兄子延年爲後

洪皓樂平人建炎初使金不屈欲殺之一酋曰此忠臣也爲請免死得流冷山凡一十五年恒以仁者以大事小智者以小事大章論金酋故宋得與金和歸卒謚忠宣

吳安國字振卿處州人紹興中以太常少卿使金值金人渝盟拘留脅服之安國毅然正色曰我首可得我節不可奪惟知竭誠死王事王命惡敢辱金人不敢犯遣還後知袁州卒

朱升建安人文公叔父紹興中副王倫使金金人令使與副探籌歸報升曰吾將命出國門已置死生度外豈幸得先歸哉古者使人有節今無節有印願以印留于我正使先歸吾獨在此于是倫解印與之而歸升留金十餘年備嘗艱苦後與洪皓俱歸至今子孫有留印堂林冲之字和叔莆田人靖康初以主客郎中副中書侍郎陳過庭使金同被拘執初猶給乳酪迨宇文虛中受其

命金人亦以是邀之冲之奮勵見詞色金人怒徙之奉
聖州二年過庭卒金人逼冲之仕偽齊不屈徙上京又
不屈置顯州極邊沍寒之地幽佛寺十餘年漸復飲茹
以義命自安髭髮還黑病亟語同難者曰某年七十二
持忠入地無恨所恨者國讐未復耳南向一慟而絕僧
窆之寺隅洪皓歸朝以聞詔與二子官過庭亦卒于燕
建炎中謚忠肅

滕茂實字秀穎東陽人一云臨安人靖康元年以工部員
外郎假工部侍郎副路允迪出使爲金人所留時茂實
兄絢通判代州已先降金粘罕素聞茂實名乃遷之代
州又自京師取其弟華實同居以慰其意欽宗自離都

城舊臣無敢候問啟居者茂實聞欽宗將至卽自爲哀詞且篆宋工部侍郎滕茂實墓九字取奉使黃旛裹以授其友人朔寧府司理董詵欽宗及郊茂實具冠幘迎謁拜伏號泣金人諭之曰國破主遷所以留公益將大用逼令易服茂實力拒不從見者墮淚茂實請從舊主俱行金人不許憂憤感疾卒雲中詵歸錄所爲哀詞言于張浚以詵爲陝西轉運判官上其事紹興二年贈龍圖閣直學士官其家三人

魏行可建州建安人建炎中以太學生應募奉使補右奉議郎假朝奉大夫尚書禮部侍郎充河北金人軍前通問使時河北紅巾賊甚衆行可始懼爲所攻旣而見使

旌皆引去行可見金人于澶淵金人知其布衣借官待之甚輕留不遣行可嘗貽書金人警以不戢自焚之禍大國舉中原與劉豫劉氏何德趙氏何罪若亟以還趙氏賢于奉劉氏萬萬也紹興六年卒十三年張邵來歸言行可執節沒于王事行可父通直郎伯能亦愬于朝遂贈朝奉郎秘閣修撰先已官其二子一弟至是復官其一孫行可之使也吳人郭元邁以上舍應募補右武大夫和州團練使爲之副不肯髡髮棄官亦卒于北閩進隸宣武建炎初遣使通問進從行旣至雲中府金人拘留使者散處之進亡去追還留守高慶裔問何爲亡對曰思大宋耳又問我主待汝有恩汝亡何故進曰錦

衣玉食亦不戀也慶裔義而釋之凡三亡乃見殺臨刑
進謂行刑者吾南面受刃南則我皇帝行在也行刑者
曳其臂令面北進踴身直起盤旋數四卒南面就死
朱勣爲武進校尉從使者至北在粘罕所爲求妻室固其
意不半月亡去追之還勣含笑死挺下

李之邵建炎初爲新喻武尉隆祐太后幸虔州從後軍叛
之邵拒之兵敗不屈大罵賊虓殺之賊酋壯其言誅害
之邵者

易青惠州人爲都督行府摧鋒軍經畧使效用紹興中爲
廣賊所執終不從賊怒焚死之贈保義郎閣門祗候

何斌爲殿前司將官童德興提禁旅戍邵武紹興中竭力

禦盜而死其屍殭立移時始仆贈武節大夫錄其後一人

連萬夫建炎四年郡賊犯應山破之賊知萬夫勇敢謀欲留萬夫萬夫怒厲聲罵賊爲所害贈右承務郎

鄭單字季厚明州人靖康二年貢于鄉建炎四年金人陷明州單爲兵所劫去逼使之降厲辭罵不屈躍入水中死妻董亦自沈後以孫清之顯貴贈太師秦國公董秦國夫人

趙立徐州益村人建炎四年以鎮撫使兼知楚州堅守孤城爲飛砲所中而卒贈奉國節度使儀同三司官其子孫十人謚忠烈

阮駿字千里莆田人紹聖初登進士第建炎初爲河南府少尹金人來寇拒戰不利亟收兵護神御殿而以餘兵再戰兵敗抱神御罵賊至死聲不絕口特贈奉直大夫薛慶起羣盜據高郵後歸朝與金人力戰而死贈保寧軍承宣使官其家十人封其妻顧氏

楊照濠州將官也金人圍城照刺賊洞腹抽腸俄中流矢死有都統丁金者遇賊十八里洲被圍大呼其徒勉以毋得負國一舟二百人皆鬪死並贈承信郎錄其後樊昌進賢人建炎初以書生爲閤門祗候舍人王虎謀逆率鄉民力戰死之紹興中贈修職郎

凌唐佐字公弼休寧人登元符進士建炎初知建康府城

陷劉豫使守應天唐佐欲圖豫密疏虛實上于朝事泄
被捕見豫責豫曰國家何負于汝而反面事虜耶豫怒
命引出斬之事聞贈徽猷閣待制

閻琦靖康中爲承務郎二帝北遷後宗室南渡不及者多
散民間豫募人索之琦匿不以聞爲豫杖死

劉化源隴州人知隴州城陷被執金使人守之不得死遂
驅入河北鬻蔬果隱民間十年終不屈辱同時原州通
判朱璞簽書樞州判官劉長儒皆與化源同鄉亦不屈
于豫紹興中各轉兩官奉祠又鳳翔教授陰焯彭陽知
縣李嘉皆守節不屈贈朝奉郎官其家一人

龔楫字濟道原之孫仕爲兵部侍郎本處州人居和州元

宋據和州楫率家屬襲之不克而死

方允武衢州人爲宜興巡檢建炎三年與金寇力戰而沒
曾志字仲常鞏之孫建炎初通判温州金酋巴八陷越志
獨不屈盡驅其家屬四十口同日殺之事聞官其弟與
三子及兄子皆將仕郎

宋昌祚和州鈴轄建炎初元木犯和州州人推昌祚權領
軍事城破昌祚與倅唐璟歷陽令審譽司戶徐玘縣尉
邵元通及指揮鄭立軍士胡廣皆死譙樓上軍士多不
降保淝湖水砦事聞贈官錄其子弟

郭瓚內江人建炎初爲汝陽令金人陷城瓚朝服坐廳事
戟手大罵與二子俱死

金光庭羅源人累官光祿寺丞出知南陽郡建炎初金人陷南陽不屈而死舉家悉遭殲戮

王相如宣城人建炎初江右盜起被執逼令草檄相如奮髯曰吾雖死不能爲賊作牒遂遇害盡室殲焉

趙不試太宗六世孫建炎初知相州金人求割地不試固守不下及州被圍久外援不至不試知不可爲遂登城與金人約勿殺許之旣啟門乃納其家井中然後以身赴井命提轄官實以土州人皆免于死

趙令晟燕懿王玄孫建炎中知黃州城陷不屈而死贈徽猷閣待制謚忠愍

趙振伯太宗八世孫建炎中通判鄭州守城力戰遇害贈

朝請大夫官其一子

趙叔憑太宗之後建炎間爲陝州都監金人圍陝州旣久援兵不至城危時叔憑子官盧氏遺以蠟丸書曰人臣當死難況吾以近屬其可辱命耶死固其所也遂死之時通判王濬職官劉效陳思道馮涇李岳杜問縣令張玘蔣佐盧亨等五十一人俱死無降者

趙士跋濮王曾孫靖康末爲右監門衛大將軍吉州團練使金人驅宗室北行士跋得間遁去居邢州結土豪將舉義金人覺而殺之贈保寧軍節度使謚忠果

趙叔皎秦悼王四世孫建炎中爲德州其馬都監城陷爲金人所執不屈而死

趙訓之字誨道秦悼王五世孫建炎二年知吉州永豐縣
與尉陳自仁衛孟太后于虔州俱爲叛賊所害贈訓之
朝散郎直秘閣謚忠果自仁通直郎

趙聿之安定郡王叔東子建炎中爲成忠郎金人陷潭州
爲所執大罵而死贈左監門衛大將軍時武經郎衛玠
亦死之贈武經大夫皆官其家

李亘字可大兖州乾封人建炎中劉豫使守大名密謀圖
豫事洩而死贈官立祠曰愍忠又有武顯大夫孫安道
爲應天府兵馬鈐轄城陷不得歸謀挺身還朝爲人所
害而死贈忠州刺史

陳淬字君銳莆田人建炎中以淮南招撫使援建康與從

子仲敏俱死贈拱衛大夫明州觀察使官其子塔

郝仲連昌化人建炎中爲貴州防禦使權河中府事城陷不屈及其子皆死贈中侍大夫明州觀察使

韓青爲熙河馬步軍第六將間行從劉惟輔爲金人所擒罵不絕口死

彊寬自金歸宋知環州與其弟震堅守孤城城陷不屈死焉贈觀察使立廟西和州賜額旌忠

李伸知天長縣建炎中金虜陷城不屈而死

牛皓福州人爲川陝宣撫後軍中部將與金人力戰而死時承信郎高萬且罵且戰與熙河路部將任安宣撫司隊官秦元薛琪張亨皆死于陣後皓安贈翊大夫官其

家五人贈萬元等官錄其子

孫暉霍丘人靖康之亂率淮民團結保護鄉井擢招信尉
建炎中金人將渡淮暉率射士民兵禦之城陷竟死于
勅書樓

屈堅爲忠州防禦使建炎三年救陝府圍被害贈三官錄
其家五人

方致堯寧國人賊戚方寇寧國致堯中流矢臥不能起遂
爲所執罵而死謚義烈詔立祠祀之

王棣守開德府建炎二十年九月金兵寇開德棣死之
孫安武長沙人爲州學正金人入城安武率居民巷戰金
人四面縱火人皆竄伏惟安武挺身罵不絕口死

劉玠潭州將官建炎中金人陷潭州玠挺身血戰中數十矢死于陣民爲立廟張栻作記

胡唐老字俊明宿之曾孫也建炎中知鎮江府潰卒戚方等欲犯臨安唐老諭以順逆衆環脅之唐老怒罵遂遇害贈徽猷閣直學士謚定愍時安撫司機宜鄭凝之亦以兵死詔官其家一人

王儔以通判真州權通判廣德軍建炎末戚方爲亂與權判官李唐俊權法司潘偶權知廣德縣韋績權丞蔣瓊皆死俱贈卹

朱嗣孟樂平人以廣德司戶安撫戚方被害贈宣教郎官其子

劉晏字平甫嚴州人以遼進士來歸累功直龍圖閣後授
宣城爲戚方所害贈龍圖閣待制官其子四人死所立
廟曰義烈

鄭振字亨叔仙遊人率鄉兵禦詹鈇又賊遇害廟食里中
袁顯益陽人建炎中湘寇楊么猖獗顯請于縣宰魏舜臣
團鄉兵以捍一日賊傾寨來戰顯極力鏖戰爲賊所得
賊欲用之顯罵賊不屈么置諸鼎鑊而死

程全休寧人爲筠州都監金人犯江西守臣遁全攝州事
賊劫掠至郡全領兵拒之兵少力罷賊遂剗其腹而去
贈協大夫錄其子孫

孟彥卿忠厚從父建炎中通判潭州與潰賊杜彥戰死于

瀏陽時添差通判趙民彥邑士謝淳俱于賊力戰被執
殺之贈彥鄉民彥直龍圖閣官其家各三人淳贈成忠
郎官其子希古後朱熹帥潭爲請立廟

王煥知武當縣建炎中賊犯均州煥率邑人保山寨賊至
或勸之遁煥曰使吾有此心則不能與邑人爲此舉矣
遂舉家死之

謝皐開封人爲鎮撫使統制官建炎中李成陷虢川欲降
之皐指腹示賊曰此吾赤心也自剖其心以死

薛良顯字貴勤瑞安人以河東轉運使與江寧亂軍周德
力戰不勝而死贈卹甚渥

丁公庸醴陵人爲高郵尉紹興初拒金兵力戰死之朝廷

嘉其忠節官其子倚

梁楚電白人紹興中攝縣令交趾犯境力戰連斃數賊後城破被害高宗贈禮部侍郎

唐傑知扶風縣與金將馮宣戰宣愛傑欲招之傑奮曰吾當死于陣不能降敵宣乃殺之

徐景知興化縣楚民胡德等寇掠馳入縣治景諭以順逆禍福賊怒欲害之景曰人誰不死得死王事亦何不可但勿傷百姓吾含笑入地矣賊義而不加害

王玠斬黃鎮撫使司幹辦公事會鎮撫使孔彥舟謀叛玠開陳百端不聽入罵曰逆賊萬段彥舟怒并家属沈之龍眠磯

范旺順昌人爲縣巡檢司軍校紹興初順昌盜俞勝苛作亂土軍陳望者與射士張袞謀舉若應之旺叱不從凶黨剔其目而殺之妻子皆遇害賊平旺死迹在地隱隱不沒邑人驚異爲設像城隍廟歲時祭享六年詔贈承信郎更立祠號忠節二十八年復詔立愍節廟以祀之呂祉字安老建陽人宣和初上舍釋褐紹興中知建康府累官兵部尚書參謀軍事以郾城叛執祉迫使趨劉豫祉大罵不從遇害贈資政殿大學士慶元間立廟賜額以旌其忠

李觀龍泉州人紹興十年與虜戰敗死之詔贈官仍官其一子

舒繼明羅山人善射紹興間守信陽僞齊劉豫襲郡城矢盡被擒罵賊而死

唐敏求字好古富塗人爲德化主簿盜起挺身率衆扞禦遂遇害贈升朝官補其子楠將仕郎

王師道字居中兗州人紹興中任吉州栗傳砦巡檢與賊戰于吳村而死立廟其地官其二子

楊載涪陵人金人立劉豫載願得白刃橫行虜中當手刃劉豫張浚壯其言使偕十士至金僞降載行反間豫果廢及欲刃虜酋而十士已亡其八遂決南歸

朱勇利州都統捍金人有功戰于瓦亭寨被執罵不絕口

死賜廟名忠節

朱友恭涇源路第一副將捍金人有功後被執不降遇害
朱蹕湖州安吉人爲錢塘令金兵迎戰款敵使民得爲逃
計中流矢創甚猶叱左右負已擊賊後數日遇害

王倫大名人紹興十四年以行人使金金欲以爲平灤二
路都轉迺使倫曰奉命而來非降也金脅以威倫拒益
力俾縊殺之倫遂冠帶南鄉再拜慟哭曰先臣文正公
以直道輔相兩朝天下所知臣今將命被留欲汚以僞
職臣敢愛一死以辱命遂就縊於是河間地震雨雹三
日聞者哀之

姚興相州人以武功累遷荆湖南路兵馬副都監紹興二
十一年金人渝盟興諫都統王權麾下時權奔仙宗山

嚴兵自衛與告急數不應初李二者嘗有私恩于權因得出入軍中竊權旗幟以遺金人至是金人立權旗幟以誤興與奔之父子俱死焉詔贈容州觀察使謚忠毅立廟戰所賜額曰旌忠

孫知微高宗時通判舒州淮賊劉忠薄舒州知微繕城郭治甲兵力與之抗久而不下及入舒知微被執又不屈忠怒鬻食之後朝廷官其二子

李明高宗時金兵入犯明從宣撫使楊存中力遏其衆外援不繼死之廕其子守中爲進武校尉

李邁字彥和龍泉人紹興中以承信郎與金人戰于西京天津橋死之

劉宣爲秦鳳路兵馬都監密遣蠟書與吳玠相約且欲率金將任拱等以所部歸朝金人覺取宣縲繫之家屬配

曹州

韓浩知淮州高宗時金兵攻濰州城陷浩與通判朱廷傑皆力戰死北海縣丞王允功司理王震皆全家陷沒浩特贈三官官其家三人餘各官其家一人

王忠植太行義士紹興中以功爲河東總管安撫使爲叛將趙惟忠所執不屈而死贈奉國軍節度使開府儀同三司官其家十人

唐琦本衛士建炎中欲襲擊金將琶八不克而死詔立廟賜名旌忠

馬俊太平州慈湖砦兵紹興中周青等據州叛俊隸青左右得其陰謀潛結其徒期殺賊于是伺青上馬斫中頰而其徒不敢前遂與妻子俱遇害贈俊修武郎立祠號登勇

翟興字公祥河南伊陽人紹興元年爲忠州團練劉豫憚之啗裨將楊偉以利偉殺興攜其首奔豫弟進知河南府亦爲賊楊進所害俱贈官錄其家

劉惟輔涇州人任熙河副總管爲金人所執誘之百方竟不從而死詔贈昭化節度使官其子孫十二人立廟成州號忠烈

朱良字良伯仕海鹽尉時金人分兵入境良集射士百餘

奮而前然力不敵竟死事聞官其子思孜等

劉十六郎瑞金人金虜犯境十六郎昆弟三人義勇戰死
岳飛以聞詔立祠旌之

魏彥明開封人通判延安金人陷西城彥明死節詔贈中
大夫官其一子

郭正孫邛州人官大府寺丞帥興元金人內侵屹守孤城
三戰三却左右勸之避正孫不從遂死于敵

金從龍浮梁人知廬州虜寇大至力不能支死之贈官廕
其子

張文之樂平人通判濠州金兵至被執送燕山欲授以官
不屈囚之士窟後王朴清于囚得一家書附還朝廷悼

嘆月給恤其家官其子孝忠

黃友字龍友平陽人也金人入寇友通判潭州戰敗被執不屈死之帝書忠節傳家四字旌其門

鄭驤字潛翁玉山人建炎初以直秘閣知同州金人來寇援絕力孤城陷虜衆欲降之不屈曰所謂太守者守死而已遂死之詔贈通議大夫謚威愍官其子五人後復加贈樞密直閣學士立祠同州賜廟額曰愍節

毛士毅富川人爲化州石城令李接反來攻城士毅謂尉曰吾與君當以死衛百姓糾合義丁與賊戰衆寡不敵遂罵賊死高宗贈承事郎

劉位招信人知滁州節制徐泗二州軍事金人入寇遣使

誘降位斬其使後出戰中流矢歿于陣贈建寧軍節度使建廟滁陽號剛烈

邊知章字公望通判開德府金人犯闕尋以和退明年冬虜大至城下知章軍潰死之贈朝散大夫官其二子

韋永壽以統制官紹興末與子承節同死于和州父子同贈官

种朴洛陽人諤之子以父任右班殿直累遷熙河蘭會鈐轄兼知河州時蕃部叛屬羌河章入寇帥胡宗回使朴討之朴至州纔二日賊鋒方銳且盛寒欲姑徐之馳檄至六七不得已遂出兵羌知朴來伏以待朴遇伏首尾不相應朴殊死戰爲賊所殺事聞贈雄州防禦使官其

後十人

張玘字伯玉澠池人紹興末以御營宿衛軍前都統與金人力戰于海州北中流矢卒贈正任觀察使官其後九人廟號忠勇孝宗卽位又命祠于戰所贈清遠軍承宣使子世雄武節大夫

陳亨祖淮寧大豪紹興末以功知海寧府與金兵力戰舉家五十餘人皆死贈容州觀察使立閔忠廟于光州劉泰樞密院忠義前軍正卒也金人犯壽春泰身被數十創死贈武翼郎官其家三人

郭僕字同升祥符人以父任調東海縣尉歷遷通判全州權梁宰未行會賊張項已逼縣境衆止之僕曰安逸則

就艱危則辭非我所學竟至縣約束吏卒誓以死戰賊聞之僞降既入邑爲變官皆竄伏僕曰吾爲宰義不可去端坐公署賊徒至僕大罵不絕口遂遇害詔贈承議郎錄其後二人

王觀國登紹興壬辰進士授陝州宜興縣尉遇黃巾賊不屈遇害事聞詔贈官一等

王拱建康府前軍統制隆興五年與金人力戰于江北而死贈正任觀察使卽其砦立忠節廟又忠亮大夫朱贊亦死之贈承宣郎

吳庸淳熙間李接作亂庸與同郡徐邦直唐捷起兵禦不克庸歿于陣徐與唐罵賊而死帥劉惇上其事俱贈承

仕郎仍官其子

王輝貴州人嘗爲栗傳砦巡檢淳熙二年擊茶寇爲賊所得欲全之含血大罵遂死贈忠州刺史與恩澤二人立廟羅坡

楊震仲字革父成都人淳熙中吳曦招之不從飲毒死贈朝奉大夫直寶謨閣官其二子表其里曰義榮謚節毅立廟旌忠

吳政寧宗嘉定十二年女直寇西和成鳳州入黃牛堡政死之

李誠之字欽茂東陽人寧宗時知蘄州金人南侵城陷于士元戰死誠之引劍將自剄呼其孥曰城已破汝等宜

速死無辱妻許及婦若孫皆赴水死事聞贈朝散大夫
秘閣修撰封正節侯賜廟曰褒忠

秦鉅字子野檜曾孫通判蘄州城破自焚而死贈秘閣修
撰封義烈侯祀于褒忠廟子浚渾同死贈通直郎淳祐
十二年加封鉅義烈顯節侯時教授阮希甫防禦判官
趙汝標皆死之同時死事者蘄春主簿甯時鳳錄事叅
軍兼司戶杜諤監蘄州都大監轄蘄口鎮倉庫嚴剛中
各贈官有差又統制官孫忠小將江士曰陳興曹金丘
卞軍士李斌等皆圖死司理叅軍趙興裕奪關出外求
援而全家十六人皆沒黃州陷守臣何大節亦投江死
陳霖字傳容泉州人真定中爲瑞金尉不屈于賊而死

徐梅龜壽昌人爲霍丘尉虜寇犯境梅龜與子尚古皆死之理宗嘉其忠贈梅龜宣教郎尚古承信郎各官其子劉宥知天水縣金兵犯境掠宥行橐視其誥命曰隨我去官北朝宥罵曰我爲南朝鬼不爲番賊官遂遇害

彭義斌理宗寶慶元年領兵徇真定嚴實以蒙古兵來襲義斌死之

陳寅咸子升卿孫知西和州寶慶年蒙古入西和寅謂妻杜氏可避兵鋒杜氏厲聲曰安有生同君祿死不共王事者寅死之杜氏飲藥自殺二子及婦俱死母傍宿客同死者二十八人

黃復字乾叟沙縣人寶慶二年第進士後攝滁州因虜攻

城援不至歿在圍中遺子書曰父老矣食君之祿繼之以死雖死猶生也

賈子坤童川懷安軍人爲西和州推官寶慶中虜至城陷與其家人十二口俱死之

舒瀛字登甫奉化人登寶慶二年進士第授衢州西安尉兵難卒起瀛先衆捍敵死之朝廷嘉其忠官其子模

曹孝先字元先奉化人官承直郎任楚州錄事叅軍寶慶乙酉沒于王事贈通直郎官其子詵立廟號旌忠

劉純字君錫建陽人以父廕補沙縣簿紹定間調湖北帳幹知邵武縣會率兵招降下瞿賊爲賊所得不屈死之事聞贈朝散郎與二子下州文學後又封壯義侯謚忠

烈純之族幹謚忠顯子羽謚忠定珙謚忠肅領謚忠簡
純謚忠烈爲五忠劉氏

趙師檟准右人以罪客游于閩紹定中寇起汀州郡司農
丞潘景伯嘗守高郵知師檟荐于提刑王夢龍俾統兵
禦尤溪賊大書旗上曰誓不與賊俱生轉戰田中馬陷
于泥賊斷左臂猶以右手殺賊力盡大呼曰師檟報國
死于此矣遂歿嘉熙初都丞旨王埜上其事贈武節郎
民爲立廟名忠愍

高談字景遂邵武光澤人紹定二年爲旁郡賊執欲其率
鄉子弟東破武陽談唾賊大罵遂遇害而里人賴以免
曹友聞字允叔彬十二世孫端平初權知沔州與蒙古兵

戰于鷄冠隘與弟萬皆死贈友聞龍圖閣學士大中大
夫賜廟褒忠謚曰節官其二子承務郎壻迪功郎贈萬
武翼大夫官其二子成忠郎

高稼蒲江人魏了翁同產也知沔州端平二年蒙古濶端
入沔稼死之贈龍圖閣直學士謚曰忠

李復明爲江陵統制端平三年蒙古將忒木解寇江陵復
明死之

楊壽孫爲雲安軍主簿端平中元兵至中江縣與蔣官何
庾安惟臣田廣直友坤等連戰二日俱死之贈恤有加
劉銳知文州嘉熙元年元兵攻急銳集其家人盡飲以藥
而死家素有禮法幼子同哥方六歲授以藥猶下拜受

之左右咸慟銳父子三人登文王臺自刎死

趙汝鼎宣城人爲文州通判城陷不屈元人先斷其兩臂而後斃殺之

何克漢州德陽人通判黎州攝州事元兵破關自刺不死百方誘之終不從臨死時東望再拜曰臣夫婦同死可以對趙氏無愧矣上下感泣同死者四十餘人勇士麟孫駒行從子仲桂先克死惟長子士龍得免

蹇彛潼州通川人通判金州端平中元兵攻陷金州彛舉家死焉弟維之利州行參軍事亦迎敵力戰死官其子王迸字純文饒州樂平人紹定間爲固始縣簿攝邑事金兵犯淮守令望風遁去迸度力不能禦懷印自投于井

而死

鄭勲字景周興化縣人嘉泰壬戌登第端平中知博羅縣
熊喬部下回戍卒焚掠州境或勸勲避其鋒勲曰吾爲
長官見賊而去如吾民何衣冠坐廳事賊至諭以禍福
不屈死之事聞贈朝奉郎

陳隆之爲制置使成都將田世顯以城叛降于蒙古隆之
舉家數百口死于元兵贈徽猷閣待制加與兩子恩澤
賜謚立廟

吳從龍字雲奉化人紹定中以建寧都統制爲先鋒援不
至被擒不屈而死廟祀泰揚二州賜額褒忠官其弟從
虎

孫益泰興人紹定中李全犯揚州應縣令王煥募爲兵後賊勢甚盛身先赴敵死之贈保義郎官其子一人同時
顧緒顧珣皆戰死贈恤亦同

王仙蜀都統守涪州二年城破自刎斷其吭不死以兩手
自撻其首而墮

曹琦蜀進士知南平軍被執脫身歸制置司辟主管機宜
文字聞統制趙安以城降就守禦地自經死

侯畠字道子樂清人寶祐五年制置使賈似道辟通判海
州與山東賊李松壽鏖戰于連山闔室遇害立旌忠廟
于海州謚節毅仍立廟其鄉

張順民兵部將也開慶中與張貴同救襄陽不克而死立

廟祀之

陳元桂撫州人開慶元年元人侵臨江元桂力疾督戰有勸其移治者曰時事如此與其死于饑寒盜賊孰若死于守土之爲光明俊偉哉遂死之詔贈待制謚正節賜錢二十萬官其二子勅立廟死所賜額褒忠

曾埴紹興人開慶己未爲瑞州錄事叅軍以州命行各縣賑恤饑民值元兵至被擒不屈死之事聞贈秩官二子羅夢棧新喻人景定元年兵入靖安夢棧死之贈宣教郎官一子

許彪孫奕之子爲四川制置司叅謀官景定二年知瀘州劉整將叛降于元命彪孫草表彪孫曰腕可斷筆不可

書合門服藥死整旣降襲都統張桂營桂及統制金文德戰死納溪曹賴合門死之又景定四年沔州都統胡世全護糧運至虎象山戰死咸淳二年元兵取開州守將龐彥海死之德祐元年瀘州守梅應春以城降珍州守江彥清巷戰死之

密祐廬州人守隆興咸淳中元兵下隆興密祐爲都統兵敗被執不屈而死

張漢英奉化人爲樊城守將時樊城被圍四年與都統制范天順牛富力戰不降旣城陷漢英死焉天順仰天嘆曰生爲宋臣死當爲宋鬼於守處縊死牛富身被重傷以頭觸柱赴火死裨將王福見富死嘆曰將軍死國事

吾豈宜獨生亦赴火死後天順贈定江軍承宣使

史季儉威州棋城主簿也成都陷于良震與壻楊誠夫爭先爲死各特贈兩官與一子下州文學

王翊字公輔郫縣人嘉熙元年爲制置使丁黼叅議官元兵破蜀朝服赴井死時轉運副使蒲東卯亦死之元兵屠漢州權州事劉當可判官邵復錄事叅軍羅由司戶叅軍趙崇啟知雒縣羅君文皆不屈而死復雍六世孫也兵入眉州知丹稜縣馬仲燁死之取簡州簡守李大全死之叩守趙晨力戰死之至遂寧民兵趙用拒戰臂已斷而戰不休至重慶進士胡天啟夫婦同罵賊死翊與趙汝鼎同立廟賜謚餘褒恤有差寶祐六年元兵援

吉平監守將楊禮周德榮死之拔長寧守將王佐父子俱死至閬州推官趙廣死之至蓬州轉運使施擇善死之至順慶帥守段元鑑堅守爲麾下殺之以降

陶居仁蕪湖人爲鎮江錄事叅軍元兵來攻城陷被執居仁曰得以死報朝廷夫何憾竟不屈爲所殺護棺還家泝流數百里不時而至鄉人異之爲立祠

張孝忠淮人德祐初呂文煥道元兵東下知信州謝枋得走入安仁調孝忠逆戰團湖坪矢盡揮雙刀擊殺百餘人後伏兵發孝忠中流矢死

王世昌德祐初權瀘州安撫使後元兵逼城誓不屈節城破自經死

續文獻通考卷之二十三
邊居誼隨州人爲新城守將咸淳中元人進逼新城居誼
堅壁不降呂文煥至城下招之居誼射煥中其右臂率
所部三千死戰皆沒居誼赴火死事聞贈利州觀察使
立廟死所

趙鼎發字漢卿昌化人德祐元年權守池州元人陷池州
鼎發死之初元人遊騎至李王河都統張林諷鼎發迎
降鼎發瞠目視林不敢復言已而林陰遣人納款鼎發
知事不濟乃謂妻雍氏曰城將破吾守臣不當去汝先
出走雍曰君爲命官吾爲命婦君爲忠臣吾獨不能爲
忠臣婦乎鼎發笑曰此豈婦人女子所能也雍曰吾請
先君死鼎發笑止之明日乃散其家貲與弟姪僕婢悉

遣之及元師薄城昴發晨起書几上曰國不可背城不
可降夫婦同死節義成雙遂與雍氏盛服同縊從容堂
伯顏入城問太守安在左右以死對深歎惜之命具棺
衾合葬祭其墓而去

唐震字景實會稽人爲饒州知州元軍入饒遣使來取降
款通判微諷震降震怒叱之曰我何忍偷生負國也城
中年少感震言殺元使者已而城陷執牘使署降震不
屈遂死焉兄椿與家人俱死贈文華閣待制謚忠介廟
號褒忠官其二子震客馮驥何新之後俱死節

江萬里都昌人以故相家居聞元兵破襄樊乃鑿池芝山
後圃扁其亭曰止水人莫喻其意及城欲破遂赴止水

死左右及子鎬相繼投沼中積屍如疊翌日萬里屍獨
浮出從者欲葬之贈太師益國公謚文忠

鮑廉知臨江軍元人徇臨江廉死之

馮仲燁知丹稜縣元兵入眉州仲燁死之

米立爲江西都統元軍畧江西立逆戰於江坊兵敗被執
不降繫獄制置使黃萬石舉軍降元元行省遣萬石諭
立曰吾官銜一牙牌書不盡今亦降矣立曰侍郎國家
大臣立一小卒耳但三世食趙氏祿趙亡何以生爲立
乃陳上生擒合死之人與投拜者不同萬石再三諭之
不屈遂遇害

阮應得守無錫德祐中蒙古兵入無錫應得死之

王汝翼知廣德縣德祐中元人入廣德汝翼死之

司馬夢求監岳州沙市城鎮德祐中蒙古阿里海涯入岳州沙市城夢求死之夢求司馬光五世孫也

夏椅安慶通判蒙古兵犯安慶知府范文虎以城降椅力不能自爲曰有死而已乃飲藥卒衣襟中有遺筆云職當其逃厄逢其否負吾君親方寸亂矣命無所逃當死而死五十六年歸其天理

趙興禧守寧國德祐初蒙古陷寧國興禧死之

姚訢知常州德祐初蒙古伯顏陷常州訢與通判陳炤都統王安節死之炤字光伯常州人城陷或勸走常熟炤曰去此一步非死所矣遂止死焉安節堅之子也守常

州力圖恢復不克而死贈書龍圖閣待制炤直寶章閣
直學士其子時節度判官胡應炎武進知縣包圭俱晉陵
人亦同戰死

徐道明常州玄妙觀道士德祐初元兵屠城道明知太守
姚書死守取觀之文籍置石函藏坎中危坐燭香讀老
子書兵至以刃脅使拜不爲動遂死之

汪立信新安人德祐元年賈似道將出師召立信爲招討
倂就建康府募兵以援江上諸郡既至建康守兵悉潰
四面皆元兵立信知事不可成率所部四十人至高郵
欲控引淮漢以爲後圖及聞似道師潰嘆曰吾今日猶
得死宋土乃扼吭而死

劉霖昌州永川人後居瀘州安撫使梅應春以城降元霖
說合州張珪潛斬關入城殺應春復瀘州珪以霖知南
平軍後卒死于兵

彭震龍永新人知永新縣值元兵至城守不下親黨劉槃
內應執震龍去震龍罵不絕口腰斬之

蕭燾夫與兄敬夫吉安人見文天祥起義兵兄弟協贊彭
震龍謀復永新縣屠兄弟同死之

尹玉寧都人從文天祥勤王死于伍牧贈濠州團練使官
其二子賜田二頃以恤其家

程洙休寧人淳祐十年進士授貴池縣簿調上元縣德祐
元年建康陷百官投牒降附程洙自縊而卒

李成大字實夫建昌人德祐初知金壇縣元兵至與戰不勝吏民脅之降乃潛與胡用存謀復金壇事泄繫獄至殺其二子終不屈死贈直秘閣謚忠節

李天勇臨川人德祐初元攻饒州天勇統強壯應援兵敗與張忠孝俱死之

李芾字叔章由廣平爲汴人官潭州知州元兵圍潭日久芾慷慨登陴與諸將分地而守民老弱皆結保伍相助不令而集芾日以忠義勉其將士死傷相籍猶乘城殊死戰城將陷召帳下沈忠遺之金曰吾力竭分當死吾家人不可辱于俘汝盡殺之而後殺我忠泣而諾取酒飲其家人盡醉乃徧刃之芾亦引頸受刃忠縱火焚其

居還家殺其妻子復至火所大慟舉身投地乃自刎叅
議楊震赴園池死妻妾奔救無及遂皆死幕僚陳億孫
顏應焱皆死潭民間之多舉家自盡城無虛井縊於林
木者相望實慶通判曾如驥亦不屈而死事聞贈芾端
明殿學士謚忠節

尹穀衡州進士寓居潭城元兵至知事不可爲乃爲二子
冠招鄉人行冠禮鄉人曰此何等時行此迂濶事穀曰
正欲令兒曹冠帶見先人于地下耳旣畢禮與其家人
自焚潭太守李芾命以酒酹之

李長庚爲湘潭丞元兵至被執不屈死之

趙良淳汝愚曾孫爲安吉州知州與提刑徐道隆固守元

兵圍安吉范文虎致書誘良淳降良淳焚書斬其使旣而戍將吳國定開門納元兵良淳閉閣自經道隆見執守者少怠亦赴水死

鄧得遇字達夫邛州人德祐二年爲廣西提刑守蒼梧元人徇桂林州南望拜書紙曰宋室忠臣鄧氏孝子不忍偷生寧甘溺死彭咸故居乃吾潭府屈公子平乃吾伴侶優哉游哉吾得其所遂投南流江而死

徐夢發浦城人登嘉熙二年進士第累官朝議大夫廣奉招捕使德祐二年元兵下江南夢發守仙霞襲兵猝至左右皆潰夢發獨踞坐大詬遂遇害

李申巽知上猶縣德祐二年元兵攻上猶申巽死之邑人

李梓一家四十七口俱死之

豐存芳字公茂鄆人稷玄孫也爲太平州倅景炎元年蒙古兵至知州孟知縉謀以城降存芳諫不聽詈之知縉遂引蒙古兵屠其家同死者十八人卒方義竊其八歲孤匿民間得存其祀

劉子存字貢伯安福人爲廣西經畧使叅議官元兵至靖江時宋主已入燕子存取笏書曰我頭可斷膝不可屈堅守而死

呂文信文德弟也德祐初以沿江副使叅議官與元兵遇于白鹿磯戰死贈定遠軍承宣使官其子立廟賜額時河湖巡檢張興宗亦死之贈武翼郎仍賜錢官其子

鍾季玉樂平人德祐時爲大都提點坑冶元兵渡江徙寓建陽兵至不屈死之

潘方平陽人監慶元府市舶慶元降元方不屈死之

耿世安爲兩淮都撥發官迎元兵鏖戰身被七創猶能追殺收兵還至數里歿贈五官立忠武廟于淮安

丁黼成都制置使也與元兵力戰死于石筍街賜額立廟王孝忠爲鎮江前軍統制兼淮東路分戍淮陰楊貴叛孝忠率衆迎戰俄永軍統制朱信降賊孝忠力不敵死焉姜才濠州人貌短悍知兵善射騎爲通州副都統與元兵屢戰屢勝復守揚州元將使人招之才曰吾寧死豈作降將軍耶被執死之

蕭龍雷字顯辰新城人建昌降元與同里人黃巡檢起兵
圖興復度勢不可支將奔入閩爲同安武人徐浚冲獲
送縣縣尹劉聖仲素與龍雷有怨殺之後聖仲于小孤
山見其神驚死

宋應龍以諮議官寓泰州元兵至裨校開門迎降應龍與
其妻自縊園中

褚一正字粹翁廬州人武舉進士爲提刑諮議督戰高沙
被創竟没于水知興化縣胡拱辰縣破亦死之

張鎧衡山人浚之後益王立詔天下勤王鎧起兵衡山得
民兵數千與文天祥接應旣而兵敗被執元叅政崔斌
欲降之鎧罵曰今日降而死何以見我祖魏國公于地

下斌令述起兵本末鏜奮筆斥罵千百言斌怒殺之

鄒鳳字鳳叔吉水人從文天祥勤王死事同死者泉州陳龍復廬陵劉子浚劉沐龍泉孫臬永新彭震龍蕭陶寧都陳繼周蜀人張忬太平州步卒呂武安豐軍人輩信太和蕭明誓丞相範從子杜許閩人林琦温州人徐臻幕下書史蕭資職書司金應樂安何時顓州陳子敬何陳二人隱竄不知所終

劉士昭太和人嘗爲鍼工與鄉人同謀復太和縣事敗血指書帛曰生爲宋人死爲宋鬼赤心報國一死而已以帛自縊死又有王仕敏者與士昭同謀而敗題其裾曰此生無復望生還一死都歸談笑間大地盡爲腥血汚

奸收吾骨首陽山臨刑嘆曰恨吾失聲不能大罵

趙孟壘合州人爲金華尉臨安降與從子由鑑懷太皇太后書詣益王擢宗正寺簿監軍復明州戰不屈磔死
孟余福王與芮從子也元兵駐紹興余謀舉兵事泄執至
臨安范文虎詰其謀逆余訴曰賊臣負國厚恩共危社稷我帝室之胄欲一泄宗社之耻乃更以爲逆乎文虎怒驅出斬之過朱廟呼曰太祖太宗列聖之靈在天何以使孟余至此都人莫不隕涕旣死雷電晝晦者久之
上官夢萬州守將也元兵圍城夔戰守甚力招之降不從
城陷巷戰而死

吳楚材名炎建昌南城人德祐元年建昌降明年春楚材

還其鄉領村料集民兵攻城元兵三道蹙之奪其長梯
鐵鈎因進攻領村不得入事聞益王府元帥承制還楚
材宣議郎帶令太社令知建昌軍俾聚軍圖再舉時江
西制置使黃萬石匿其命楚材既失利且乏援走光澤
爲人所執及其子應登以獻郡遣錄事婁南良訊之曰
何爲錯舉楚材抗聲曰不錯不錯如府錄所爲乃大錯
耳府錄受宋官爵今乃爲敵用事還思身上緣袍自何
而得吾一鄙儒特爲忠義所激爲國出力事雖不成正
不錯也南良媿而語塞後爲江西制置招討使斬其父
子傳首諸邑益王聞而哀之贈官朝奉郎卽邵武境上
立廟賜名忠勇

黃介字剛中分寧人德祐初率鄉兵爲保聚計北兵奄至
面中六矢不動復中十三矢倚柵而死妻劉被虜子用
中逃不死及壯求母十三年始獲人稱黃孝子

張珏字君玉鳳州人德祐初知重慶府守節不屈而死時
閬州守將楊大淵推官趙廣蓬州守將張大悅運使施
擇善皆死節

趙立字德修重慶人德祐初爲大社令湖北提刑使趣蜀
諸將入衛不成自沈于水

周偉德祐間爲浮梁丞元兵起偉曰以守無城以戰無兵
柰何然受人之命而不爲其事非仁也食人之祿而不
死其難非勇也卒死之

趙與擇秀王嗣也德祐二年出鎮瑞安與守臣方洪同伏節而死又有趙孟錦者襲元兵不克而死

徐道隆字伯謙武義人德祐初以江陵提點刑獄入援臨安爲元兵所執與子同赴井死贈官賜謚厚恤其家立廟吉安

洪福夏貴家僮也從貴積勞爲鎮巢雄江左軍統制江北降福與子大淵大源復之貴降元招福不聽使從子往福斬之後爲貴詭誘破城先戮其子次及福福大罵數貴不忠請身南向死以明不背國也聞者流涕

高應松字貧畝長樂人開慶元年進士官翰林權直德祐末元兵至臨安應松不肯草降表後從弟昺至燕絕粒

不語越七日卒

陳奎安仁人益王卽位奎領江東安撫使師屯火焚山戰潰復起兵敗于積烟山與弟年同死之

林空齊永福人失其名舉進士歷知縣解官家居益王立張世傑圖泉州乃率鄉人黃必大劉全祖卽其家開忠義局起義兵復永福值王積翁以福安送欵約北兵屠永福空齊乃盛服坐堂上嚙指血書壁曰生爲忠義臣死爲忠義鬼俄見執不屈而死

李庭芝字祥甫由汴徙爲應山縣人恭帝時守揚州兀朮圍揚久庭芝與指揮使姜才守禦益力及臨安旣陷兀朮以太皇太后手詔諭降庭芝登城謂使者曰奉詔守

城未聞以招諭降也及帝如瓜州太皇太后復賜庭芝
詔庭芝不荅及夏貴以淮西降元术復遣貴降卒至城
下示庭芝庭芝曰吾惟一死而已使者復持詔招之庭
芝開壁納使者斬之焚其詔於陴上已福州使至庭芝
與姜才將兵七千趨泰州元术驅庭芝妻子至陴下招
降會姜才疽發背不能戰泰州守將胡惟孝孫貴開門
納元兵庭芝赴蓮池中水淺不死遂與姜才俱就執元
术責其不降才曰不降者我也憤罵不已皆見殺揚民
聞者莫不泣下

徐應獬字巨翁江山人爲太學生景炎元年蒙古伯顏入
臨安應獬與其二男琦松一女元娘同登樓自焚諸僕

撲火救免乃同赴井死益王立贈秘閣修撰

黃俊爲廣州摧鋒將景炎元年蒙古軍入廣州俊死之

苗再成爲直州守將景炎元年蒙古兵陷直州再成死之
趙時踐字容月宋末人僑居采石德祐間攝建平縣事元
人南下入縣撻鼓禦敵勢窮與妻子僕妾九人赴溪潭
死焉

馬塋宕昌人以六郡鎮撫使守咸淳府元將楊文安與塋
同里招降不聽旣而城陷悉力巷戰死之

丘必明保昌人官韶州僉判德祐中元兵逼城下必明不
屈爲敵所殺白血流地韶人哀其忠節立祠祀之

馬堅爲靜江守將時阿里海牙克靜江府斷其首猶握拳

奮起立踰時始仆墜旣死部將婁鈐轄等守月城求牛
米揀饑而降旣得食之擁一火砲然之聲如雷震城皆
崩烟焰蔽天外兵多驚死者火息人視之灰燼無遺
黃文政淮人戍蜀軍潰間道走靜江馬堅遠與同守城破
文政被執大詬不屈元人斷其舌以次剝削之文政含
胡叱咄比死不絕聲

熊飛曾逢龍與元人戰於南雄敗績曾死之飛奔韶州元
人圍韶州守將劉自立以城降飛率兵巷戰敗赴水死
陳文龍字君貴興化人俊卿之後益王稱制時守興化被
執元兵欲降之文龍指其腹曰此皆節義文章也可相
逼即卒不屈乃械送杭州文龍不食死

趙時賞張日中德祐二年元李恒襲文天祥於興國縣天祥出走師潰於空阬時賞日中皆死之

趙希汨宗室子居宜春德祐中以廣東轉運使勤王文天祥兵敗與從子必向被囚俱不食而死

陳瓚文龍從子也守興化元陵都攻之瓚閉城拒守陵都臨城諭之矢石雨下城破巷戰終日獲瓚車裂之

張德興淮安人景炎二年與淮西野人原寨劉源等起兵興復司空山與黃州壽昌未幾元襲破司空山復陷壽昌德興死之

劉伯文吉水人景炎二年伯文詣督府受文書結約遠近爲巡兵所執斬于袁市慷慨自引一不累人

陳學心安仁人歷官高州知府謝枋得起兵令守安仁元兵至力戰而死時餘干張仁旦亦率鄉兵應枋得力戰而死

楊恕字仲如四明人篤學力行歷陞憲司知事宋祚將危以忠義自勵不食數日赴菱塘而死

袁鏞字天與鄞人咸淳進士尚氣節元兵至鄞鏞往軍前責以大義元將竒其才脅令降縱火燎之鬚髮盡不少變遂死其日家人驚悼赴水死者十有七人

馬發知朝州景炎中蒙古兵陷朝州發死之

顏思立顏起巖鞠叔華聞文丞相開府于汀相結赴義後元兵奄至三人同日死之

張烈良爲河南制置使帝昺祥興元年起兵應厓山與元
阿里海牙戰敗死之海南州縣皆陷沒趙與珞亦死之
陸秀夫字君實塩城人以左丞相輔帝昺于崖州儼然如
治朝祥興二年元張弘範攻厓山張世傑兵潰秀夫奉
帝昺赴海死時丹徒茅相以秀夫薦授兵部侍郎亦同
死於海

高貴祥符人舉進士累官知高郵府扈從之海上擢樞密
使與陸秀夫同死厓山

彭呂泰和人元兵陷虔呂不屈入廣從文丞相赴難死
蕭資吉水人文丞相幕下書史與元兵遇死之

吳希奭安福人文丞相起兵奭自以名通于督府後遇元

軍衆寡不敵一門三十口俱死之

伍隆起新會人三世仕宋宋末隆起率義兵從帝昺于厓山與元將張弘範力戰不屈其麾下謝文子殺隆起降弘範宋相陸秀夫惜之刻木爲首以葬又募人執文子戮以祭墓

孫臬文丞相之妹壻也丞相方擁兵出鎮臬爲叛者所陷不屈死之

劉昂孫江陵人官翰林學士德祐初從二王至厓山陸秀夫負王赴海死昂孫亦驅家屬並輜重沈海不死爲元兵所執榜掠無完膚一夕得脫卒蹈海死

劉洙廬陵人文丞相隣曲也兵敗被執至豫章與長子同

日被刑

張雲吉水人城降元雲不勝忿乃謀興復引所部夜襲元營天明戰渴赴江飲水元軍衝擊之雲赴水死

趙孟濟以功知清江後元兵至城陷孟濟死之

張世傑范陽人以樞密副使越國公立衛王昺于厓山旣敗欲浮海再圖恢復颶風大作舟人欲抵厓世傑曰無以爲也爲我取辦香來乃焚香祝天曰若天不欲復興宋室則大風覆我舟舟遂覆世傑死之

汪繼宗歙人生淳祐間見國祚不競有恢復中原之志福王與芮召見愛之妻以女宋亡自以受國恩不卽死無以見祖宗于地下遂不食而卒

王用龍進賢人宋亡用龍誓不爲異國民後爲元鎮守兵
所獲碎鼂器劇吮而死

謝君直名枋得號疊山信州弋陽人景定甲子江東漕闕
校文發策問權姦誤國趙氏必亡忤買似道貶興國軍
三年遇赦得還元兵南下郡城潰棄家入閩至元二十
三年御史程文海承旨留夢炎等交薦累召不赴二十
六年春正月福建行省叅知政事魏天佑復被詔旨集
守令戍將迫促上道臨行以詩別常所往來者曰雪中
松柏愈青青扶植綱常在此行天下豈無龔勝潔人間
不獨伯夷清義高便覺生堪捨禮重方知死甚輕南八
男兒終不屈皇天上帝眼分明夏四月至京師不食死

年六十有四秋八月子定之奉柩歸葬門人誄而題之
曰文節先生謝公墓

家鉉翁眉州人宋末知建寧府兼福建轉運副使後簽書
樞密院事元兵迫郊鉉翁獨不署降表宋亡旦夕哭泣
不食飲者數月成宗卽位放還賜號處士錫賚皆不受
羅一理進賢人宋亡謝枋得爲江西招諭使一理偕弟起
潛赴義被擒不屈背腰斬弟臨刑謂一理曰今日得死
所矣

文天祥吉水人宋右丞相少保信國公初元張弘範襲執
天祥於五坡嶺天祥吞腦子不死至潮陽見弘範左右
命之拜天祥不屈厓山旣平弘範謂天祥曰國亡丞相

忠孝盡矣能改心以事宋者事大元將不失爲宰相也
天祥泣然出涕曰國亡不能救爲人臣者死有餘罪况
敢逃其死而貳其心乎乃以天祥北去道經吉州痛恨
不食八日猶生乃復食至燕館人供帳甚盛天祥不寢
坐達旦遂移兵馬司設卒守之旣而丞相孛羅召見天
祥入長揖欲使跪天祥不屈孛羅怒命囚於獄所作有
正氣歌已而又召天祥於獄欲用之天祥固辭欲殺之
不果後以中山狂人之變乃殺之